


三才圖會

大器圖說 卷一 第一



龍井庵常注

龍井庵

930481

大慧普覺禪師普說

參學



慧然

錄

淨智居士黃

文昌

重編

師到雪峯值建菩提會請普說問話畢乃云菩提宿
將坐重圍劫外時聞木馬嘶寸刃不施魔膽碎望風
先已豎降旗雪峯法窟真歌場中人人懷報佛報祖
之心箇箇抱安國失家之略智如鷲子辯若滿慈雲
門今日到來只得結舌有分然官不容針私通車馬
既到遮裏不可徒然略借主人威光與大眾赴箇時
節遂拈起拄杖云還委悉麼天高羣象正海闊百川
朝卓一下復云大凡參學之士須遇本分人始得



謚大覺禪師
蘭溪道隆

佛灯國師
約翁德儉

柏岩可禪

建仁定惠院開祖
頑石曇生

江州瑞雲山永安寺彌天永寂禪師

開甘泉天恩二刹 塔曰寶相

應永廿二年夏勅謚見性悟心禪師

出于延宝傳灯錄十七

寂室元光

彌天永釋

佛一人之在古而今入大惠寺也
識奇貨之在天下也如珠如璧
若夫燈之有也

苦不遇本分人只是箇打虛漢只如適來上座問芭
蕉拄杖子話本分答佗却理會不得如今諸方多少
錯商量學家眼既不明出來伸一問禪牀上瞎漢將
合頭語祇對便道扶過斷橋水伴歸無月村一句來
一句去道我答得玄答得妙學者不識好惡祇向皮
袋裏將去到處合合得著則倒來印可宗師合不著
便將遮般不材不淨蘊在曾襟輕薄好人作地獄業
你看佗真歇說禪都不計較據學人問處信口便說
更無滯礙自然如風吹水只爲佗實見實說如普賢
菩薩從佛華莊嚴三昧起普慧菩薩如雲興致二百
問普賢菩薩如餅瀉以二千酬又何曾思量計較來

蓋得法自在稱法性說如今人不曾親證親悟只管
百般計較明日要陞座一夜睡不著遮箇冊子上記
得兩句那箇冊子上記得兩句關關湊湊說得一片
如花似錦被明眼人冷地覷見只成一場笑具奉勸
諸人明眼宗師難逢難遇既得遭逢如靠一座須彌
山相似直須退步放下許多人我無明從前冊子上
記持學得底撥置一邊不要強作主宰佗時異日閻
羅老子打鬼骨臀便是打遮般強作主宰底不是雲
門謾你諸人遮話有分付處面前頓却一千五百人
善知識爲你作證不向遮裏說更向何處說所以此
事決定不在言語上若在言語上一大藏教諸子百

家徧天徧地豈是無言更要遠磨西來直指作麼畢
竟甚麼處是直指處你擬心早曲了也如僧問趙州
如何是祖師西來意州云庭前柏樹子遮箇忒殺直
又僧問洞山如何是佛山云麻三斤又僧問雲門如
何是佛門云乾屎橛遮箇忒殺直你擬將心湊泊佗
轉曲也法本無曲只爲學者將曲心學縱學得玄中
又玄妙中又妙終不能敵佗生死只成學語之流本
是箇無事人却返被遮些惡毒在心識中作障作礙
不得自在所以教中道法不可見聞覺知若行見聞
覺知是則見聞覺知非求法也喻似有人問城中路
從甚麼處去指云從遮裏去聞說便行早曲了也遮

箇如何將知見解會計較得失玄妙是非底心去學
得你要真箇參但一切放下如大死人相似百不知
百不會驀地向不知不會處得遮一念子破佛也不
奈你何不見古人道懸崖撒手自肯承當絕後再蘇
歟君不得諸人既來雪峯參禪切不得容易此是明
眼宗師可以依附堪爲法式或者見真歇勸人發菩
提心生謗議云既稱禪師自有宗門本分事只管勞
攘却如箇座主相似我且問你那箇是本分事苦哉
自既不能爲善返笑佗人爲善遮般底人我生滅嫉
妬不除自是其是善知識既不勸人發菩提心不可
教人殺人放火去遮箇曲录本迹上不是你討名討

利嫉妬生滅之處以道眼觀之如鑊湯鑪炭劍樹刀
山一般擊動法鼓諸天龍神齊集道眼不明諸天龍
神見你口吐黑煙寧不怖畏豈不見教中道未得謂
得者是增上慢謗大般若人不通懺悔譬如窮人妄
號帝王自取誅滅況復法王如何妄竊因地不真果
招紆曲須是真實始得夫稱善知識者引導一切衆
生令見佛性當須觀根設教應病與藥不可對三家
村裏人說拄杖子朝到西天暮歸東土扇子教跳上
三十三天築著帝釋鼻孔東海鯉魚打一棒兩似盆
傾去也雖是本分說話教佗如何理會遮老漢你禪
和子尚自覓佗縫罅不得況佗俗人處身塵網現行

無明若無善巧方便接引令其純熟如何便領會得
此會盡是一二十程拋家遠來一人入社發心轉化
多人爲善寧無利益遮箇是善知識本分合做底事
豈是強爲雲門今夏在廣因開箇燈心阜角鋪子隨
家豐儉說此麤禪室中問學者一句子如不思量計
較天真自然道得一句更與一拶擬議不來劈脊一
棒別無細膩忽然打發一箇半箇却教上來雪峯就
大鑪鞴事同一家早來真歇舉世尊入舍衛大城乞
食飯食訖收衣鉢洗足已敷座而坐須菩提出衆作
禮曰希有世尊真歇云釋迦老子幸自可憐生被須
菩提出來道箇希有當下冰銷瓦解解好大衆釋迦老

子未曾說一字須菩提見箇甚麼便道希有諸人要
會麼但向真歇冰銷瓦解處看忽然看得破一生參
學事畢只如真歇尋常見學者多認目前鑑覺求知
見覓解會無有歇時不得已教人向劫外承當據實
而論遮一句已是多了此是一期方便如指月示人
當須看月莫認指頭如今人理會不得將謂實有恁
麼事祖師所謂錯認何曾解方便既不識方便語便
向然燈佛肚裏坐黑山下鬼窟裏不動坐得骨聾生
胝口裏水漉漉地肚裏依前黑漫漫地驢年夢見麼
雲門今夜對人天衆前合諸聖說話各自記取言多
去道轉遠適來真歇有一段公案未了雲門爲佗結

絕却昔有一老宿訪臨濟纔相見提起坐具云禮拜
即是不禮拜即是濟便喝宿便禮拜濟云遮賊宿云
賊賊便出濟云莫道無事好首座侍立次濟云還有
過也無座云有濟云賓家有過主家有過座云二俱
有過濟云過在甚麼處座便出濟云莫道無事好師
云臨濟暗中輸了一籌却向明中贏得一著雖然有
輸有贏有明有暗爭奈傍觀者醜且道誰是傍觀者
良久云若到諸方不得錯舉

定光大師請普說僧問一法若有毗盧墮在凡夫萬
法若無普賢失其境界去此二塗請師速道師云脫
殼烏龜飛上天進云親切已蒙師指示一句無私利

有情師云作麼生是親切處進云昨夜清風生八極
今朝流水漲前谿師云泊不問過乃云諸佛本不
曾出世亦復無有般涅槃以本自在大願力示現無
邊希有法是法不可以思惟究竟非心所行處既非
心所行即非希有法既非希有法此法無實亦無虛
既無虛實喚作有亦不得喚作無亦不得喚作亦有
亦無亦不得喚作非有非無亦不得喚作非非有非
非無亦不得不見適來禪客問一法若有毗盧墮在
凡夫萬法若無普賢失其境界去此二塗請師速道
雲門答佗道脫殼烏龜飛上天諸人且作麼生辨明
爲是有耶是無耶是虛耶是實耶試出來道看如無

更引些葛藤所以先聖道有時先照後用有時先用
後照有時照用同時有時照用不同時若也先照後
用則瞎一切人眼若也先用後照則開一切人眼若
也照用同時則半瞎半開若也照用不同時則全開
全瞎此四則語有一則有賓無主有一則有主無賓
有一則賓主俱無有一則全具賓主即今衆中或有
箇不受人謾底漢出來道遮裏是甚麼所在說有說
無說虛說實說照說用說賓說主攔臂搗住拽下禪
牀爛椎一頓也怪佗不得還有恁麼人麼如無杓柄
却在雲門手裏放行把住說有說無說虛說實說照
說用說賓說主總由遮裏且道即今放行好把住好

良父云開人眼瞎人眼一手推一手挽不是三要三
玄亦非四種料揀畢竟是箇甚麼舉拂子云雪峯輓
毬睦州擔版復云諸人總道來遮裏參禪我且問
你禪作麼生參既爲無常迅速生死事大已事未明
求師決擇要得自己明白心地安樂不是兒戲而今
人箇箇道我怕死參禪參來參去日久月深打入葛
藤窠裏只贏得一場口滑於自己分上添得些兒狼
藉返不如未入衆時却無許多事此蓋末上一錯不
遇好人遞相公襲以致如此近來佛法可傷魔強法
弱禪和家每人有一肚皮禪到處鬪百草相似驢年
得休歇麼尋常向你諸人道祖師西來只是作得箇

證明底人亦無禪道傳與人若有禪道可傳則各自
傳與父母傳與六親眷屬去也既無可傳須是當人
自悟始得你擬心求悟早錯了也豈況多知多解恣
意亂統不見香巖和尚在百丈會裏直是聰明靈利
數年參禪不得只爲多知多解百丈遷化後到潞山
山云我聞汝在百丈先師處問一答十問十答百此
是汝聰明靈利意解識想生死根本父母未生時試
道一句看香巖被潞山一問直得茫然却歸寮中將
平日看過底文字從頭檢過要尋一句可將酬對竟
不能得乃自歎曰畫餅不可充飢屢上堂頭乞潞山
說破山云我若說似汝汝已後罵我去我說底是我

底終不干汝事。香嚴奈何不得。肚裏只管悶。又怪瀉山不爲佗說破。遂將平昔所集文字。以火焚却。曰。休。休。此生不學佛法也。且作箇長行粥飯僧。免役心神。從此一時放下。禪也不思量。道也不思量。善也不思量。惡也不思量。父母未生時。底也不思量。即今底也不思量。四楞著地。一切放下。便辭瀉山。直過南陽觀。忠國師遺迹。遂憇止卓菴。一日。芟除草木。因颺瓦礫。驀然擊著一竿竹。作聲不覺。打著父母未生時。鼻孔。當時如病得醫。如暗得燈。如貧得寶。如子得母。歡喜無量。遂沐浴焚香。遙禮瀉山。歎曰。和尚大悲。恩逾父母。當時若爲我說破。豈有今日事。乃有頌曰。一擊亡。

所知。你看佗得底人。發言自是不同。初聞擊竹作聲。忽然大悟。所悟底心。便絕消息。如彌勒彈指。樓閣門開。命善財入善財心。喜入已還閉。便是遮箇道理。香嚴悟處。既絕消息。父母未生時事。頓爾現前。纔作箇頌子。便有爲人底方便。下面注曰。更不做修治。動容揚古路。不墮悄然機。處處無蹤迹。聲色外威儀。諸方達道者。咸言上上機。多見禪和子。愛去到處問長老。長老家無著口處。便爲佗解說。你怕佗香嚴說得未分曉。在更要注解。又有一般人也。道因擊物作聲。有箇悟處。或問佗。你試說看。便擊物作聲。曰。多少分明。有甚麼交涉。大似隔鞞。使拳頭肥痒。如何得快活去。

又不見昔日俱胝和尚住菴時因一尼戴箇笠子直來遶佗繩牀一匝云道得即放下笠子俱胝當時道不得尼拂袖便行俱胝云何不且住尼云道得即住俱胝又無語尼去後俱胝自歎云我雖是箇丈夫漢却不如箇婦人便要燒菴下山忽夜夢神人曰和尚不須下山且候當有肉身大士來爲和尚說法也過數日果見天龍和尚到來俱胝遂舉前話似之天龍曰你問我我與你道俱胝曰道得即放下笠子天龍遂豎起一指俱胝忽然大悟後凡有所問只豎一指每曰我得天龍一指頭禪一生受用不盡琅琊覺和尚嘗有頌曰俱胝一指報君知朝生鷄子搏天飛若

無舉鼎拔山力千里烏騅不易騎你看遮一頌便是會得遮一指頭禪分曉也遮箇如何學得俱胝身畔有一供過童子每見人問佗事也學豎指祇對有人謂俱胝曰和尚遮童子也不可得亦會佛法凡有人問佗皆如和尚豎指俱胝聞得一日潛將一柄刀在袖中喚童子近前來聞你也會佛法是否云是俱胝曰如何是佛童子便豎起指頭被俱胝捉住以刀斫斷童子叫喚走出俱胝遂喚童子童子回頭俱胝曰如何是佛童子不覺將手起不見指頭忽然大悟奇哉信知佛法不可傳不可學俱胝得處不在指頭上香嚴悟處不在擊竹邊且道在甚麼處一時說了也

諸人還會麼。此事非難非易。差之毫釐。失之千里。奉勸諸人退步自看。一切現成。便請直下承當。不用費力。你擬動一毫毛地。便是千里萬里沒交涉也。諸人既在遮裏。須生慚愧。不得容易過時。若不存誠般若。中將甚麼銷佗。信施不見。汾陽無業禪師曰。看佗古德道人得意之後。茅茨石室。向折脚鐵中煮飯喫過三二十年。名利不干懷。財寶不爲念。大忘人世隱迹巖叢。君王命而不來。諸侯請而不赴。豈同我輩貪名愛利。汨沒世塗。如短販人有少希求。而忘大果灼然兄弟那時。早有如此說話也。更教佗見我輩如今做處也。好慚惶殺人。兄弟光陰可惜。時不待人。各自打

辦精神。打教徹去。亦不虛受。佛廬亦不孤負。平生學道之志。近日道上座自雪峯來。再三求入室云。直爲無常迅速。生死事大。已事未明。欲乞開示。因舉馬祖不是心。不是佛。不是物。教渠看。更與佗注解一徧。不得作道理會。不得作無事會。不得作擊石火閃電光會。不得向意根下卜度。不得向舉起處承當。不是心。不是佛。不是物。合作麼生。渠遂疑著。更不敢開口。今日却來燒香禮拜曰。妙道學般若。多有魔障。欲請今晚爲對人天衆前。舉揚般若。以憑懺悔。願法界一切有情。皆得頓悟。甚深般若。同報佛恩。雲門曰。古聖有言。怖心難生。善心難發。自未得度。先度人者。菩薩發

心既知怖罪回心向道此亦希有遂從其請爲渠懺悔且罪性不在內外中間將甚麼懺然無有有罪底聖人亦無無罪底凡夫凡夫造罪皆自妄想心起都無實體雖無實體受報時亦須妄受如影隨形不可逃避雖妄受報亦無實體所以道若罪性有體則盡虛空界不能容受何故爲凡夫造罪者多今道上座發一念心欲直取無上佛果菩提此心一發所作之罪如積乾草高須彌山所發之心如芥子許火悉能燒盡無有遺餘還信得及麼此一念心既發當時成佛已竟盡未來際永不退失以何爲驗不見教中天帝釋白法慧菩薩曰佛子菩薩初發菩提之心所得

功德其量幾何法慧菩薩曰此義甚深難說難知難分別難信解難證難行難通達難思惟難度量難趣入雖然我當承佛威神之力而爲汝說假使有人以一切樂具供養東方阿僧祇世界所有衆生經於一劫然後教令盡持五戒南西北方四維上下亦復如是於意云何此人功德寧爲多不天帝釋言此人功德唯佛能知其餘一切無能量者法慧曰此人功德比菩薩初發心功德百分不及一千分不及一百千分不及一如是億分百億分千億分百千億分乃至阿僧祇分無數無量無邊不可說分不可說不可說分亦不及一次第引衆生欲樂邊際諸根差別從十

至百從百至千從千至萬從萬至億從億至不可說
不可說阿僧祇數衆生盡令持五戒十善乃至第二
人復倍前人之數展轉至百人一人倍一人之數盡
令證須陀洹斯陀含阿那含阿羅漢辟支佛果所得
功德比菩薩初發心功德百分不及一乃至不可說
算數譬喻亦不能及盡其譬喻無較量處何故此一
念心與三世諸佛平等無二無別故梵語懺摩此云
悔過謂之斷相續心一懺永不復造此心一發永不
退失若能直下無心去初發心功德比無心功德百
分千分百千分百千萬億分乃至算數譬喻不可說
不可說阿僧祇分亦不及一何故初發心時與三世

諸佛平等故此心尚無三世諸佛向甚處摸捺所以
一念無心功德又無較量處若尔則亦無生亦無死
亦無聖亦無凡亦無人亦無我亦無佛亦無法若能
如是見得是真懺悔道上座既具大丈夫志氣決定
要參禪但恁麼參須是豁然悟去直下無心方得安
樂若不悟只是口頭道得幾箇無無更引些古人說
無處錯證據了便道我得休歇我且問你還歇得也
未乃是將心無心若將心去無心心却成有如何硬
無得古聖訶爲落空亡底外道魂不散底死人謗大
般若不通懺悔雖是善因而招惡果遮般見解如稻
麻竹葦打殺百千萬箇有甚罪過遮般底管取有一

肚皮疑在若自無疑始有方便爲他人決疑若自有疑如何爲人除得疑擬欲除佗疑再與佗添得一重疑所謂我眼本正因師故邪諸人要知自無疑能與人除疑者麼昔世尊在靈山會上說法有五百比丘得四禪定具五神通未得法忍以宿命智通各各自見過去世時殺父害母及諸重罪於自心內各各懷疑於甚深法不能證入是時文殊知衆疑怖承佛神力遂手握利劒持逼如來世尊乃謂文殊曰住住不應作逆勿得害吾吾必被害爲善被害文殊師利爾從本已來無有我人但以內心見有我人內心起時我必被害即名爲害於是五百比丘自悟本心如夢

如幻於夢幻中無有我人乃至能生所生父母於是五百比丘同聲說偈讚文殊曰文殊大智士深達法源底自手握利劒持逼如來身如劒佛亦尔一相無有二無相無所生是中云何殺大衆文殊雖然爲衆決疑費力不少雲門今日爲道上座決疑且不用利劒只有箇不是心不是佛不是物若向遮裏疑情脫去天下橫行若不然者聽取箇注脚一刀截斷生死路摩醯正眼頂門開無邊業障俱銷殞畢竟如何寒山拾得在天台以拂子擊禪牀一下喝一喝傳菴主請普說師云傳菴主入堂挂搭就今日設供仍請雲門爲衆普說且道說箇甚麼即得若是全鋒

敵勝同死同生正按旁提橫來豎去蟠根錯節結角
羅紋於諸人分上正是小孩兒則劇家事不勞拈出
既不許恁麼各請解下腰間多年曆日聽取雲門說
箇古話記得二祖問達磨曰弟子心未寧請師與安
達磨曰將心來與汝安二祖良久曰內外中間覓心
了不可得達磨曰與汝安心竟二祖當時便休歇去
又三祖問二祖曰弟子身纏風恙請師懺罪二祖曰
將罪來與汝懺三祖良久曰內外中間覓罪了不可
得二祖曰與汝懺罪竟三祖當時便休歇去遮兩則
語叢林舉唱者如麻似粟錯會者如稻似穀若不作
心性會便作玄妙會不作玄妙會便作理事會不作

理事會便作直截會不作直截會便作奇特會不作
奇特會便向擊石火閃電光處會不向擊石火閃電
光處會便颺在無事甲裏不颺在無事甲裏便喚作
古人兩則公案向三條椽下七尺單前閉眉合眼坐
在黑山下鬼窟裏思量下度若作遮一絡索道理欲
明此事大似鄭州出曹門且喜沒交涉既不許恁麼
又如何理會雲門已是面皮厚三寸分明爲諸人說
破第一不得錯會我說底達磨從西天將得箇無文
印子來把二祖面門一印印破二祖得此印不移易
一絲頭把三祖面門印破自後一人傳虛萬人傳實
遞相印授直至江西馬祖馬祖得此印於讓和尚便

道自從胡亂後三十年不曾少鹽醬師喝子喝云印
文生也百丈大智禪師得此印於馬祖翻身跳入五
百生前野狐窟裏頭出頭沒直至如今不肯回黃蘗
和尚得此印於百丈便道汝等諸人盡是噇酒糟漢
恁麼行脚何處有今日還知大唐國裏無禪師麼臨
濟和尚得此印於黃蘗便解到處作白拈賊至今累
及兒孫興化和尚得此印於臨濟便解向雲居處權
借一間以爲影草南院和尚得此印於興化直得赤
肉團上壁立千仞有僧問古殿重興時如何曰明堂
瓦插簷僧曰恁麼則莊嚴畢備也曰斬草蛇頭落風
穴和尚得此印於南院則曰大參學眼目直須大用

現前勿自拘於小節設使言前薦得猶是滯殼迷封
縱然句下精通未免觸塗狂見汝等諸人應是從前
學解明昧兩歧如今爲汝一時掃却直須箇箇如師
子兒吒髻地孝吼一聲壁立千仞誰敢正眼覷著覷
著則瞎却渠眼有問語默涉離微如何通不犯則曰
長憶江南三月裏鵲鵲啼處百花香首山和尚得此
印於風穴便拈起竹篋問學人曰喚作竹篋則觸不
喚作竹篋則背有問如何是佛則曰新婦騎驢阿家
牽汾陽和尚得此印於首山則曰汾陽門下有西河
師子當門踞坐但有來者即便咬殺作何方便入得
汾陽門見得汾陽人慈明和尚得此印於汾陽把臨

濟金剛王寶劒折作兩段只用釣絲絞水楊歧和尚
得此印於慈明便向無煙火於死柴頭畔白雲和尚
得此印於楊歧便向多處添些子少處減些子五祖
和尚得此印於白雲賤賣擔版漢貼稱麻三斤百千
年滯貨無處著渾身圓悟老師得此印於五祖將三
百六十骨節八萬四千毛竅一時撒向諸人懷裏師
驀拈拄杖面前畫一畫云不得過界復舉起云遮一
隊不唧溜老漢性命盡在雲門手裏即今對衆將遮
印子爲佗打破欲使後代兒孫各各別有生涯免得
承虛接響遞相鈍置遂卓一下云印子百雜碎了也
且道遮一隊老漢在甚麼處安身立命還見麼良久

云眼睫眉毛都落盡轉使傍觀笑不休復卓一下喝
一喝

黃德用請普說師云邵武高士黃端夫信向佛乘知
有此事捐家財起菴一所以圓悟揭名屢有書來乞
分楊歧一枝佛法去彼爲衆生作大利益雲門不敢
容易諾之又託吳元昭學士再三懇禱亦未敢輕許
不幸端夫忽尔化去聞啓手足時呼其二子再三囑
之曰若爲吾於雲門請得一本分住菴人則死無遺
恨矣言訖長往二子不忘遺訓求元昭學士撰疏遣
專使請彌光禪人作菴主見其至誠遂令應命今德
用昆仲特詣當菴揮金辦供命山僧普說舉揚宗旨

以答諸聖加被之恩且喚甚麼作宗旨宗旨又如何
舉揚近代佛法可傷邪師說法如恒河沙各立門風
各說奇特逐旋捏合疑誤後昆不可勝數參禪者既
不具擇法眼爲師者又道眼不明以至如是雲門初
與元昭不相識頃在江西見渠跋所施華嚴梵行品
自言於梵行品有悟入處不疑天下老師舌頭那時
已得其要領即與兄弟說此人只悟得箇無梵行而
已已被邪師印破面門了也雲門若見須盡力救他
及乎在長樂相見便來咨聞入室即時將渠悟入處
只兩句斷了曰公所悟者永嘉所謂豁達空撥因果
莽莽蕩蕩招殃禍耳更爲渠引梵行品中錯證據處

曰於身無所取於修無所著於法無所住過去已滅
未來未至現在空寂無作業者無受報者此世不移
動彼世不改變此中何法名爲梵行梵行從何處來
誰之所有體爲是誰由誰而作爲是有爲是無爲是
色爲非色爲是受爲非受爲是想爲非想爲是行爲
非行爲是識爲非識如是觀察梵行法不可得故若
依此引證謂無梵行是真梵行則是謗大般若入地
獄如箭射更爲渠說而今諸方邪師輩各各自言得
無上菩提各說異端欺胡謾漢將古人入道因緣妄
生穿鑿或者以無言無說良久默然爲空劫已前事
教人休去歇去歇教如土木瓦石相似去又怕人道

坐在黑山下鬼窟裏隨後便引祖師語證據云了了常知故言之不可及歇得如土木瓦石相似時不是冥然無知直是惺惺歷歷行住坐卧時時管帶但只如此修行久久自契本心矣或者以脫去情塵不立窠臼爲門戶凡古人公案舉了早會了也或師家問不是心不是佛不是物你作麼生會便云和尚不妨惺惺或云和尚甚麼處去來或云不可矢上更加尖或云謾却多少人或再舉一徧云不是心不是佛不是物凡問他古人因緣皆向舉起處承當擊石火閃電光處會舉了便會了凡有所問皆不受喚作脫灑自在得大快樂或者以三界唯心萬法唯識爲主宰

引一類古人相似處作證明以眼見耳聞爲得力處凡通入處未有不見物而悟者未有不聞聲而悟者凡有施設倣效古人相似處有人問話只黏定學家問頭便答謂之言下合無生正如福州人聯麻相似喚作綿密不落情塵如僧問古德如何出得三界云云把將三界來爲你出或云喚甚麼作三界或云會得遮僧問頭出三界也不難如僧問法眼如何是曹源一滴水答云是曹源一滴水慧超咨和尚如何是佛答云汝是慧超引如此之類作證乃全是全不是又如論藥山夜間示衆云我有一句子待特牛生兒即向汝道有僧出衆云特牛已生兒也自是和

尚不道藥山云點燈來其僧便歸衆後來法燈出語云且道生底是牯牛是特牛自代云雙生也商量時亦作言下合無生會藥山云我有一句子待特牛生兒便是道了也所以遮僧領得便出來道特牛已生兒也自是和尚不道直是綿密不露鋒鏃法燈徵云且道生底是牯牛是特牛又自代云雙生也亦只作言下合無生會云佗自問牯牛特牛乃自代云雙生也更無少剩佛眼也覷不見將此等語作以的破的不露鋒鏃不費氣力會又如古人指一片石問學者云此一片石在心内在心外答云在心内古德云你著甚死急心内著一片石衆中商量云不合以内外

答佗若以内外答則法有少剩矣出語云大好一片石或云痛領一問或云喚甚麼作一片石或云諾諾或云在法堂前或云謝師指示或云和尚還識羞麼或云鈍置殺人凡答如此話只以一句包却謂之綿密謂之不走作如此之見叢林甚多或者謂一切語言總不干事凡舉覺時先大瞠却眼如小兒患天弔見神見鬼一般只於瞠眉努眼處領略更錯引古人言句證據曰舉不顧即差互擬思量何劫悟舉時須要以眼顧視只是以古人言句提撕一徧喚作不在言句上如栢樹子洗鉢盂麻三斤之類若過得一箇時餘者撥牌子過更不費力如此之類比擊石火閃

電光底只添得箇瞠眉努眼而已亦各各自謂得祖
師巴鼻莫謗佗古人好如舉僧問雲門如何是透法
身句門云北斗裏藏身你作麼生會學者即大瞠却
眼云北斗裏藏身師家或權爲沮抑學者又連叫數
聲云北斗裏藏身北斗裏藏身以謂把得定作得主
不受轉換師家奈何不下亦換作實頭方始問其意
旨如何遂下語云佛眼也覷不見或云舉頭天外看
或問如何是祖師西來意庭前栢樹子即下語云一
枝南一枝北或云能爲萬象主不逐四時凋已上盡
在瞠眉努眼提撕處然後下合頭語以爲奇特癡漢
不可瞠眉努眼時便有禪不瞠眉努眼時便無禪也

不可提撕時便有禪不提撕時便無禪也或者見雲
門如此說便又錯會云提撕時也是不提撕時也是
更無兩般似遮般底更是救不得或者都不理會纔
說著佛法說著悟處便是發狂更錯引古人言句云
本無迷悟人只要今日了凡古人因緣謂之設權亦
謂之建立實頭底只在不作佛法商量處凡有問答
一一據實祇對平常無事天是天地是地露柱是木
頭金剛是泥塑飢來喫飯困來打眠更有何事豈不
見真淨和尚云莫將無事會無事困人心往往中無
事毒者却以此言爲非或者見古人公案不可以理
路商量處便著一轉沒交涉底語一應應過謂之玄

妙亦謂之不涉義路亦謂之當機透脫如僧問趙州
萬法歸一一歸何所州云我在青州作一領布衫重
七斤之類多少人錯商量云遮僧致得箇問頭奇特
不是趙州有出身之路便奈何不得云萬法歸一一
更無所歸若有所歸即有實法所以趙州識得破當
機妙用一應應過云我在青州作一領布衫重七斤
多少奇特或者商量道萬法歸一一歸何所一若無
所歸即落空去所以趙州道我在青州作一領布衫
重七斤趙州遮一轉語直是奇特不落有無答得甚
妙或者謂雲門如此說只是怕人執著若不執著便
是祖師心要只要得是事不著自由自在非離真而

立處立處即真更有甚麼事或問佗父母未生時如
何是你本來面目便云無侍者祇對和尚將箇業識
作本命元辰如此之流盡是癡狂外邊走又有一般
底自知道眼不明禪不取信於人無以開示學者自
來又不曾聽教旋於座主處作短販連得一言半句
狐媚聾俗臨濟和尚曰有一般瞎禿兵向教乘中取
意度商量成於句義如將屎塊子口中含了却吐與
別人直是回耐元昭初見如此說心中雖疑口頭甚
硬尚對山僧冷笑當晚來室中只問渠箇狗子無佛
性話便去不得方始知道參禪要悟在長樂住十日
二十徧到室中呈盡伎倆奈何不得方始著忙山僧

實向渠道不須呈伎倆直須啐地折爆地斷方敵得
生死呈伎倆有甚了期仍向渠道不須著忙今生參
不得後世參遂乃相信便辭去隔十餘日忽然寄書
來并頌古十首皆山僧室中問渠底因緣書中云在
延平路上驀然有省某終不敢自謾方信此事不從
人得其中一首曰不是心不是佛不是物通身一串
金鎖骨趙州參見老南泉解道鎮州出蘿蔔山僧甚
是疑著時光禪便問據此頌還了得生死否雲門向
渠道了得了不得却請問取元昭去比得光禪書云
學士相見盡如和尚所說大衆且道說箇甚麼咦疑
殺天下人具眼者辨取今時參禪者不問了得生死

了不得生死只求速效且要會禪無有一箇不說道
理如檀越給事見其愛說道理遂將箇沒道理底因
緣與渠看僧問雲門如何是佛門云乾屎橛又恐渠
作道理會先與渠說不得云道在屎溺道在穉穉道
在瓦礫即色明心附物顯理不得道處處真塵塵盡
是本來人之類渠看此話奈何不下用盡氣力去看
終看不破忽然一日省得此事不可以道理通便道
我有箇悟處遂連作數頌來呈見解一曰太虛寥廓
強爲名任是僧繇畫不成何用尋源問端的都無一
法可當情又曰到家豈復說塗程萬木春來自向榮
若遇上流相借問扶桑東畔日輪生又曰羶羊過後

絕追尋妙訣空傳在少林閑把無絃彈一曲清風明月兩知音又曰撒手懸崖信不虛根塵頓盡更無餘始知佛法無多子向外馳求轉見踈山僧向渠道作得頌也好說得道理也是只是去道轉遠渠不甘又作一頌曰切忌談玄說妙那堪隨聲逐色和遮一極掃除大家都無見識又有書來云看此話直得言語道斷心行處滅無言可說無理可伸不起纖毫修學心百不知百不會不涉思惟不入理路直是安樂山僧又向渠道遮箇是出格底道理若是乾屎橛話如此說得落時如鋸解稱鎚麻三斤狗子無佛性一口吸盡西江水不是心不是佛不是物有句無句如藤

倚樹即心即佛話皆可如此說得也既不可如此須是悟始得悟則事同一家不悟則萬別千差差之毫釐失之千里切須子細從教人道雲門待檀越無禮但心不負人面無慚色渠見山僧如此至誠相告方知佛法無人情乃相信既相信只教看如何是佛乾屎橛亦只要得渠啐地折曝地斷若以渠作從官捨財物菴置莊田供衆乃至供養山僧之故便以爲是則盡大地窮漢更無參禪分也非但失却善知識辨人眼亦乃賺佗百劫千生不是小事今夏更有數人衲子不肯向省力處做工夫只管熱忙亦來呈見解作頌古雲門向佗道不是遮箇道理便道把定佗不

肯放過我且問你你還自放得過也未趙州云諸方
難見易識我遮裏易見難識雲門尋常問學者喚作
竹篋則觸不喚作竹篋則背不得下語不得無語十
箇有五雙眼被瞋地縱有作聰明呈見解者盡力道
得箇領字或來手中奪却竹篋或拂袖便行自餘邪
解不可勝數更無一箇皮下有血古德云此事如八
十翁翁入場屋不是小兒戲若可捏合得時捏合千
千萬萬了也既不可捏合須是悟始得此外別無道
理若你實有悟處師家故言不是亦招因果不小今
日因齋慶讚舉似大眾蓋黃端夫知有雲門始因元
昭光禪往彼住菴亦因元昭端夫二子今日設齋請

山僧普說亦因元昭雲門打遮一場葛藤亦因元昭
既然如是且道元昭畢竟事作麼生良久云待渠冬
間親到雲門那時始與諸人說破拍禪牀下座

秦國太夫人請普說僧問圓覺經道譬如清淨摩尼
寶珠映於五色色未現時珠在甚麼處師云圓覺經
何曾恁麼道進云未審作麼生會師云圓覺經不曾
恁麼道更會甚麼進云畢竟如何師云靜處薩婆訶
問胡張三黑李四即不問嘉州大像鼻孔長多少師
云長二百來丈進云得恁麼郎當師云你川僧自合
知進云爲甚麼被陝府鐵牛吞却師云誰恁麼道進
云高高處觀之不足低低處平之有餘師云你試向

不高不低處道看進云險師云遮箇猶是高低處底
進云有意氣時添意氣師云草賊大敗乃云今日
是秦國太夫人計氏法真慶誕之辰謹施淨財遠詣
當山修設清淨禪衆香齋仍命山野陞于此座爲衆
普說舉揚般若所願進道無魔色身安樂此是秦國
太夫人意旨遮婆子平生行履處川僧無有不知者
唯魯子僧未知今日因齋慶讚舉似大衆見說遮婆
子三十左右歲時先太師捐館徽猷與相公尚幼卓
卓立身凜然有不可犯之色東隣西舍望風知畏極
力教二子讀書處事極有家法尋常徽猷與相公左
右侍奉不教坐亦不敢坐其嚴毅如此相公常說今

日做官皆是老母平昔教育所致所得俸資除逐日
家常菜飯外老母盡將布施齋僧用祝吾君之壽
常有無功受祿之慊聞先師歸蜀受渠供養不少只
是未知參禪徽猷與相公却於先師處各有發明向
謙禪在佗家徽猷與相公親向謙道老母修行四十
年只欠遮一著公久侍徑山和尚多所聞見且留公
早晚相伴說話蓋某兄弟子母分上難爲開口見說
每日與謙相聚只一味激揚此事一日問謙徑山和
尚尋常如何爲人謙云和尚只教人看狗子無佛性
話竹篋子話只是不得下語不得思量不得向舉起
處會不得去開口處承當狗子還有佛性也無無只

怎麼教人看渠遂諦信日夜體究每常愛看經禮佛
謙云和尚尋常道要辦此事須是輟去看經禮佛誦
呪之類且息心參究莫使工夫間斷若一向執著看
經禮佛希求功德便是障道候一念相應了依舊看
經禮佛乃至一香一花一瞻一禮種種作用皆無虛
棄盡是佛之妙用亦是把本修行但相聽信決不相
誤渠聞謙言便一時放下專專只是坐禪看狗子無
佛性話聞去冬忽一夜睡中驚覺乘興起來坐禪舉
話驀然有箇歡喜處近日謙歸秦國有親書并作數
頌來呈山僧其間一頌云逐日看經文如逢舊識人
勿言頻有礙一舉一回新山僧常常為兄弟說參得

禪了凡讀經看文字如去自家屋裏行一遭相似又
如與舊時相識底人相見一般今秦國此頌乃暗合
孫吳你看他是箇女流宛有丈夫之作能了大丈夫
之事謙禪昨日上來告山僧子細說些禪病且與秦
國結大衆般若緣山僧向佗道禪有甚麼病可說禪
又不曾患頭疼又不曾患脚痛又不曾患耳聾又不
曾患眼暗只是參禪底人參得差別證得差別用心
差別依師差別因此差別故說名為病非謂禪有病
也如何是佛即心是佛有甚麼病狗子還有佛性也
無無有甚麼病喚作竹篋則觸不喚作竹篋則背有
甚麼病如何是佛麻三斤有甚麼病如何是佛乾屎

概有甚麼病你不透了纔作道理要透便千里萬里沒交涉也擬心湊泊佗擬心思量佗向舉起處領略擊石火閃電光處會遮箇方始是病世醫拱手然究竟不干禪事趙州云要與空王爲弟子莫教心病最難醫記得舍利弗問月上女曰汝於今者行何乘也爲行聲聞乘爲行辟支佛乘爲行大乘月上女答曰舍利弗汝既問我行何乘者我今還問舍利弗惟願隨意答我如舍利弗所證法者爲行聲聞乘爲行辟支佛乘爲行大乘舍利弗言非也月上女所以者何然彼法者無可分別亦無言說非別非一亦非衆多月上女曰舍利弗是故不應分別諸法一相異相無

別異相於諸相中無有可住師云舍利弗恁麼問月上女恁麼答且道與秦國太夫人所證之法相去幾何還有人斷得麼試出來斷看如無且向葛藤裏薦取所以道夫參學者須參活句莫參死句活句下薦得永劫不忘死句下薦得自救不了你諸人每日上來下去寮舍裏喫茶喫湯莊上般鹽般麪僧堂裏行益長廊下擇菜後園裏擔糞磨坊下推磨當恁麼時佛眼也覩你不見且道是死句是活句是不死不活句試定當看直饒定當得出也未免在三句裏豈不見僧問南泉和尚即心是佛又不得非心非佛又不得師意如何泉云你但信即心是佛便了更說甚麼

得與不得只如大德喫飯了從東廊上西廊下不可
總問人得與不得也遮裏若識得南泉方不被三句
所使便使得三句既使得三句始與南泉同一眼
見同一耳聞同一鼻喫同一舌嘗同一身觸同一意
思更無差別只爲你執藥爲病舊病未除新病復作
卻被死句活句使得來七顛八倒將佗古人徑截處
一時紆曲了且那箇是古人徑截處我更爲你舉一
兩則只如南泉道牽牛向谿東放不免食佗國王水
草牽牛向谿西放不免食佗國王水草不如隨分納
些些總不見得遮箇公案有多少人錯斷如何是納
些些底道理便道著衣喫飯有甚麼難向驢前馬後

作活計且莫謗佗南泉好你既錯會遮箇定又錯會
黃檗道汝等諸人盡是噇酒糟漢恁麼行脚何處有
今日還知大唐國裏無禪師麼時有僧出云只如諸
方匡徒領衆又作麼生檍云不道無禪只是無師遮
箇話頭便是箇禍胎莫道未悟者錯會直饒悟得徹
頭徹尾大法不明也觀佗黃檗不見只如黃檗道不
道無禪只是無師你如何理會衆中商量道人分
上誰不丈夫豈假師承噇酒糟便是咬言語言語乃
古人糟粕也且喜沒交涉欲得不招無間業莫謗如
來正法輪豈不見馮山舉此話問仰山云黃檗意作
麼生仰山云鵝王擇乳素非鴨類馮山云此實難辨

只如馮山仰山怎麼問答又作麼生商量到遮裏須是箇人始得既不會遮箇便將庭前栢樹子麻三斤乾屎橛鋸解稱鎚之類盡爲糟粕既錯會遮箇定有錯會洞山問蟾首座佛真法身猶若虛空應物現形如水中月作麼生說箇應底道理蟾云如驢覷井山云道則太殺道只道得八成蟾云和尚作麼生山云如井覷驢諸方商量道如驢覷井是有迹如井覷驢是無迹又喚作二情拂迹且喜沒交涉要且不是遮箇道理既錯會遮箇定又錯會讓和尚道譬牛駕車車若不行打車即是打牛即是馬祖聞舉忽然大悟而今禪和家理會道牛喻心車喻法但只明心法自

明矣但只打牛車自行矣且喜沒交涉若怎麼馬祖驢年也不能得悟去遮老漢始初將謂佛可以坐得成禪可以坐得悟一向坐地等讓和尚知其不凡故將輓去佗菴前磨祖云和尚磨輓作甚麼讓云磨作鏡祖云磨輓豈得成鏡讓云磨輓既不成鏡坐禪豈得成佛馬祖被佗動一動心中熱忙便問如何即是只遮裏鼻孔索頭便在讓和尚手裏了也所以道欲識佛性義當觀時節因緣讓和尚知佗時節已至即向佗道汝學坐禪爲學坐佛若學坐禪禪非坐卧若學坐佛佛非定相於無住法不應取捨汝若坐佛即是殺佛若執坐相非達其理一時籍沒了佗家計卻

更要作納物事教他無所從出始肯捨命討箇死處
命既捨了便解問如何用心即合無相三昧讓云汝
學心地法門如下種子我說法要譬彼天澤汝緣合
故當見其道又問道非色相云何能見讓云心地法
眼能見乎道無相三昧亦復然矣祖云有成壞否讓
云若以成壞聚散而見道者非也馬祖於是泮然無
疑所謂不入虎穴不得虎子悟了若不遇人十箇有
五隻杜撰決定爲人不得諸人要識悟了遇人者麼
只遮馬祖便是樣子也馬祖既得法直往江西建立
宗旨一日讓和尚曰道一在江西說法總不見持箇
消息來遂囑一僧云汝去待他上堂便問作麼生看

佗道甚麼記取來其僧依教去見上堂便出問作麼
生祖云自從胡亂後三十年不曾少鹽醬師召大衆
云祖師門下穿人鼻孔底盡從遮一句子來你道遮
一句子從甚麼處來從打牛打車處來你若會得遮
箇便會得臺山路上婆子每有僧問臺山路向甚麼
處去婆云驀直去僧纔行婆云好箇阿師卻恁麼去
趙州聞得云待我去勘過遮婆子趙州去見婆子亦
如是問婆子亦如是答歸來謂衆云臺山路上婆子
被老僧勘破了也諸人還會麼寮中天子勅塞外將
軍令但恁麼看取山僧昔年理會不得曾請益一杜
撰長老爲山僧注解云遮僧纔問臺山路向甚麼處

去便被婆子勘破了也婆云驀直去僧便行正是隨聲逐色如何不被勘破又道纔開口便勘破了也今日思量直是耐耐山僧爲你說破若會得趙州道臺山路上婆子被老僧勘破了也便會婆子道好箇阿師卻恁麼去山僧嘗頌云天下禪和說勘破爭知趙州已話墮引得兒孫不丈夫人人點過冷地卧此頌甚分明切不得錯會既錯會遮箇定又錯會睦州喚僧大德僧回首州云擔版漢曾有箇禪頭舉遮話問僧你作麼生會纔見僧開口便云果然擔版且喜沒交涉雪竇拈云睦州只具一隻眼遮僧喚既回頭因甚卻成擔版晦堂云雪竇亦只具一隻眼遮僧一喚

便回爲甚不成擔版遮兩箇老漢可與睦州把手共行若是箇靈利漢纔聞舉著眼似銅鈴終不向遮裏打之遶既不會遮箇定又錯會百丈野狐話便道不落也是不昧也是只是當時答此話不合帶疑所以墮野狐謂野狐性多疑故且喜沒交涉既錯會遮箇定又錯會祖師云不是風動不是幡動仁者心動山僧亦曾請益一箇長老意旨如何長老將衫袖搖作風動勢云是甚麼苦哉苦哉慚惶殺人鈍置殺人有者道不是風動不是幡動定是心動山僧尋常問學者不是風動不是幡動不是心動作麼生遮裏豈容眨眼既錯會遮箇定又錯會文殊是七佛之師爲甚

麼出女子定不得罔明菩薩爲甚麼出得女子定衆
中商量道杓柄在女子手裏且喜沒交涉旣錯會遮
箇定又錯會雪峯道望州亭與汝相見了也烏石嶺
與汝相見了也僧堂前與汝相見了也如今諸方商
量道作麼生是望州亭相見處便道南頭買賊北頭
賣貴烏石嶺相見意旨如何便道石頭大底大小底
小僧堂前相見又作麼生便道歸堂喫茶去且喜沒
交涉自餘邪解不可勝數山僧尋常亦問學者望州
亭與汝相見了也烏石嶺與汝相見了也僧堂前與
汝相見了也作麼生遮箇便是金剛圈栗棘蓬你如
何吞如何透你要識能吞能透者麼豈不見保福問

鵝湖僧堂前且置望州亭烏石嶺甚麼處相見鵝湖
驟步歸方丈保福便入僧堂汾陽和尚頌曰望州烏
石與堂前相見相知幾萬千唯有鵝湖并保福此時
相見解推遷此頌分明爲你說了也旣不會遮箇定
又錯會玄沙道諸方總道接物利生或遇三種病人
來合作麼生接患盲者拈槌豎拂佗又不見患聾者
語言三昧佗又不聞患啞者教伊說又說不得若接
此人不得佛法無靈驗師顧視大衆云要識玄沙麼
平生心膽向人傾相識還如不相識當時地藏和尚
在座下便出來道某甲有口不啞有眼不盲有耳不
聾和尚作麼生接師云非父不生其子玄沙呵呵大

笑師云笑裏有刀山僧有時舉此話問學者有來依
樣畫葫蘆也道某甲有口有耳有眼和尚作麼生接
山僧向佗道咬人屎橛不是好狗又却去不得既錯
會遮箇定又錯會香嚴道如人上樹口銜樹枝手不
攀枝脚不蹋樹樹下有人問西來意不對則違佗所
問若對又喪身失命師云好與玄沙一坑埋却山僧
昔年曾請益一箇尊宿未審香嚴意旨如何遂以拂
子柄銜在口中緊閉却眼便作銜樹枝勢搖手擺脚
祇對山僧師乃彈指云如此者亦是當年馳聲走譽
底尚作遮般去就其餘作怪不在言也你要會麼但
只作一句看我先爲你說莫見道作一句看便向舉

起處會舉了便會了且不是遮箇道理是甚麼道理
如人上樹口銜樹枝手不攀枝脚不蹋樹樹下有人
問西來意不對則違佗所問若對又喪身失命如何
遮裏間不容髮當時香嚴會中只有箇虎頭上座領
得香嚴意便出來爲香嚴出氣云上樹即不問未上
樹請和尚道師云雖得一場榮利却一雙足香嚴呵
呵大笑師云鐵作面皮又云回天輪轉地軸後來雪
竇拈云樹上道即易樹下道即難老僧上樹也致將
一問來雪竇雖爲虎頭上座出氣爭奈蹉過香嚴今
時有般謬漢聞雪竇恁麼道便引洞山語云但能莫
觸當今諱也勝知朝斷舌才謂香嚴立此箇問頭喻

如一團火相似不可觸雖然如此不可斷却言句有
問如何是佛麻三斤如何是祖師西來意庭前柏樹
子又且何妨你不妨會得好不見汾陽和尚頌曰香
嚴銜樹示多人要引同袍達本真師云依實供通擬
議却從言下覓喪身失命數如塵師云不是苦心人
不知汾陽爲你開天路雲散長空月色新師云閑言
語雖然如是若向遮裏提得一生參學事畢既提不
得定又錯會百丈問馮山五峯雲巖云併却咽喉脣
吻作麼生道馮山云却請和尚道百丈云我不辭向
汝道恐已後喪我兒孫五峯云和尚也須併却百丈
云無人處斫額望汝雲巖云和尚有也未百丈云要

我兒孫衆中商量道百丈大似抱賊叫屈掩耳偷鈴
三子恁麼祇對大家走入荒草裏且喜沒交涉向你
道此事決定不在言語上既不在言語上當恁麼時
合作麼生我早是與你說了也既錯會遮箇定又錯
會德山道今夜不答話問話者三十棒時有僧出禮
拜德山便打僧云某甲話也未問爲甚打某甲山云
你是甚處人僧云新羅人山云未聞船舷好與三十
棒後來法眼云大小德山話作兩橛圓明云大小德
山龍頭蛇尾雪竇拈云二老宿雖善裁長補短捨重
從輕要見德山亦未可何故德山大似握閫外威權
有當斷不斷不招其亂底劔要識新羅僧麼只是撞

普
著露柱底箇瞎漢衆中商量道某甲話也未問便好打德山不打却問你是甚處人遮裏便是話作兩極龍頭蛇尾處且喜沒交涉又道遮僧若是作家纔見佗問你是甚處人便好掀倒禪牀佗既不能却被德山道未蹋船舷好與三十棒遮裏是當斷不斷不招其亂底劍所以雪竇云要識新羅僧麼只是撞著露柱底箇瞎漢且喜沒交涉禪若是恁麼地會得時更不消悟也聰明靈利底一時隨語生解解注將去便了我且問你恁麼解注得一時有下落了生死到來却如何支遣而今分明向你道遮些閑言長語便是出生死底徑路你莫去徑路上栽荆棘掘屎窖或若

有箇衲僧出來道和尚現在遮裏栽荆棘掘屎窖也不是却作麼生祇對山僧有箇推托處且如何推托聽取一偈女流中有大丈夫示現其身化其類以戒定慧解脫法攝彼貪欲瞋恚癡雖處於中作佛事如風行空無所依過去未來及現在塵沙諸佛及菩薩異口同音發是言善哉奇特世希有心源清淨無憂喜不作無喜無憂想逢場作戲隨世緣而於世緣無所著六月火雲燒碧空雷聲忽震三千界銷除熱惱獲清涼是彼丈夫誕時節我說此偈助光明普施法界諸女人喝一喝

劉侍郎親書華嚴經施師仍請普說僧問擲大千於

方外納須彌於芥中是甚麼人分上事師云是沒量
大人分上事進云因甚麼被學人蹋在脚下師云你
見箇甚麼道理便開許大口僧便喝師云好一喝未
有主在進云須知五十三人善知識到遮裏也摸捺
不著師云你分上事作麼生進云今日逢強即弱師
云何不禮拜僧便禮拜師乃云五十三人善知識
摸捺不著處即是諸人日用消息諸人摸捺不著處
即是五十三人善知識日用消息諸人日用消息五
十三人善知識決定摸捺不著五十三人善知識日
用消息諸人決定摸捺不著所以道諸法無作用亦
無有體性是故彼一切各各不相知亦如火聚猛

焰同時發各各不相知諸法亦如是便恁麼去擲大
千於方外納須彌於芥中豈是分外雖然如是第一
不得向祖師門下過若向祖師門下過定打折你驢
腰以拂子擊禪牀一下復云杼山居士劉公以手
寫大方廣佛華嚴經一部施妙喜道人受持仍渾金
辦供以伸慶懺妙喜今日登曲录木爲居士發揚且
要大家知有佛言一切世界諸羣生少有欲求聲聞
乘求獨覺者轉復少趣大乘者甚難遇趣大乘者猶
爲易能信此法倍更難今有信此法者手寫是經黑
底是墨白底是紙喚甚麼作此法此法又如何舉揚
即今還有能信此法者麼出來爲杼山居士證明若

證明得居士功不唐捐若證明不得妙喜乘便下坡
爲諸人說箇影子黃面瞿曇始成正覺時在摩竭提
國阿蘭若法菩提場中於一塵內破此一塵演說如
來廣大境界妙音遐暢無處不及豈不是此法不離
一切菩提樹下而上升須彌向天帝釋妙勝殿普光
明藏師子座上說十住品豈不是此法不離一切菩
提樹下及須彌山頂而向夜摩天宮寶莊嚴殿寶蓮
花藏師子座上入菩薩善思惟三昧說十行品豈不
是此法不離於此菩提樹下及須彌頂夜摩天宮而
往詣兜率陀天一切妙寶所莊嚴殿摩尼藏師子座
上說十回向品豈不是此法不離兜率陀天而往詣

佗化自在天宮摩尼寶藏殿住一切菩薩智所住境
入一切如來智所入處說十地品豈不是此法不離
佗化自在天宮復至摩竭提國普光明殿入佛華莊
嚴三昧說離世間品豈不是此法不離摩竭提國向
室羅筏國逝多林給孤獨園大莊嚴重閣入不可說
佛刹微塵數神變海及種種三昧門說入法界品豈
不是此法毗盧遮那及諸大菩薩七處九會咸集其
所互爲主伴一一交參現大神變乃至善財不離自
所住處入普賢毛孔刹中行一步過不可說不可說
佛刹微塵數世界如是而行盡未來劫猶不能知一
毛孔中刹海次第刹海藏刹海差別刹海普入刹海

成刹海壞刹海莊嚴所有邊際乃至念念周徧無邊
刹海教化衆生今向阿耨多羅三藐三菩提當是之
時善財童子則次第得普賢菩薩諸行願海與普賢
等與諸佛等一身充滿一切世界刹等行等正覺等
神通等法輪等辯才等言辭等及不可思議解脫自
在悉皆同等豈不是此法若尔則須知杼山居士未
動毛錐未形紙墨時已與毗盧遮那如來及不可說
微塵數刹土諸佛菩薩廣大境界一一平等一一無
差別以至周旋八十一卷行布圓融亦與善財未見
文殊未發阿耨多羅三藐三菩提心及發心已來徧
歷諸城承事諸善知識次第滿足普賢諸行願海亦

無差別如上所說豈不是此法杼山居士既尔妙喜
老漢亦尔妙喜老漢既尔現前大衆亦尔現前大衆
既尔森羅萬象大地山河亦尔所謂塵塵尔念念尔
法法尔一法既尔諸法亦然一塵既尔諸塵亦然諸
塵既然則不越此念不破此塵入息不居陰界出息
不涉萬緣常轉如是經百千萬億卷又何勞杼山居
士明窓淨几引筆行墨特地周遮妙喜老漢承虛接
響鼓舌搖脣無風起浪雖然如是要且只明得此法
影子邊事與此法正文了無交涉諸人要識正文麼
諦聽諦聽汲水炷香天女侍長者之著論剥皮析骨
菩薩讚毗盧之發心欲見聞以成善因故筆墨而爲

佛事偕衆香之一鉢餉妙喜於東方伏願知識如善財之衆多行願如普賢之殊勝具十回向證三菩提我人衆生等無差別佛法僧寶共作證明上來講讚無限勝因一切智智清淨無二無二分無別無斷故夜來州前石師子無端教跳撞入陳四公酒樓咬破湘山祖師鼻孔杜順和尚忍痛不禁出來道懷州牛喫禾益州馬腹脹天下覓醫人炙猪左膊上纔作是說各各平復如故汝等諸人還知決定義也無良久云不見道能信此法倍更難喝一喝

錢計議請普說僧問昔日僧問楊歧和尚如何是佛答云三脚驢子弄蹄行未審意旨如何師云天上天

下沒蹤迹進云只如威音王已前是甚麼人騎師云威音王已後是甚麼人騎僧擬議師便喝乃云威音王已前三脚驢兒教跳威音王已後楊歧老人絕消息既絕消息却因甚麼三脚驢兒教跳若也於斯明得方知威音王已前三脚驢兒果然教跳若明不得楊歧老人一生受屈正當恁麼時如何是雪屈一句喝一喝云泊合弄險復云蘊聞上座今日代子虛來請爲衆普說老漢曰說箇甚麼即得聞曰請和尚拈出楊歧金剛圈栗棘蓬布施大衆又曰如忠國師大珠和尚說法諸方大有疑其拖泥帶水不徑截說義理禪願和尚疏決真偽解大衆疑惑此亦是請

普說檀越之意老漢曰諾所以大覺世尊初悟此事
在摩竭提國三七日內無下口處自云我寧不說法
疾入於涅槃信知說法之難豈同容易尋念過去佛
所行方便力然後起道樹詣鹿苑隨衆生根器說一
大藏教末後收因結果却云始從鹿野苑終至跋提
河於是二中間未曾說一字只遮便是揚歧所謂金
剛圈栗棘蓬也直是難吞難透到遮裏直下承當得
了大法未明亦奈何不得敢問諸人何者名爲大法
金剛圈却如何透栗棘蓬却如何吞不見巖頭道若
將實法繫綴人土亦銷不得況十方信施耶諸佛出
世祖師西來無非只爲你諸人作箇證明底主宰而

已若有法可傳可授則諸佛慧命豈到今日故祖師
云心地隨時說菩提亦只寧事理俱無礙當生即不
生若會得此四句即透得金剛圈吞得栗棘蓬不須
要明大法大法自明矣以至古人差別異旨因緣心
性玄妙大法若明纔舉起時便會得恰如磁石見鐵
相似輕輕一引便動須是舉一明三目機銖兩點著
南邊動北邊舉起時便明得而今諸方有數種邪禪
大法若明只遮邪禪便是自己受用家具好擊石火
閃電光一棒一喝底定不愛說心說性者只愛機鋒
俊快謂之大機大用好說心說性底定不愛擊石火
閃電光一棒一喝者只愛絲來線去謂之綿綿密密

亦謂之根脚下事殊不知正是箇沒用處弄泥團底
漢看它前輩大法明底尊宿用處轉轉地如南陽
忠國師大珠和尚是也唯楊文公具眼修傳燈錄時
將忠國師大珠和尚列在馬祖下諸尊宿之右將廣
語所有言句盡入其中六祖下收忠國師語最多爲
他家活大門口大法性寬波瀾闊難湊泊遮般法難
說他禪備衆體如三喚侍者話喚作說老婆禪挖泥
帶水得麼一日喚侍者侍者應諾如是三喚侍者三
應師云國師三喚侍者何曾有孤負侍者三應甚麼
處是孤負處國師曰將謂吾孤負汝誰知汝孤負吾
師云平地起骨堆復云叢林中喚作國師三喚侍者

話自此便有一絡索唯雪竇見透古人骨髓云國師
三喚侍者點即不到師云灼然侍者三應到即不點
師云却不恁麼將謂吾孤負汝誰知汝孤負吾護雪
竇不得師云誰道復召大衆云好箇謾雪竇不得雖
然如是雪竇亦謾妙喜不得妙喜亦謾諸人不得諸
人亦謾露柱不得玄沙云侍者却會雪竇云停囚長
智師云兩彩一賽雲門道作麼生是國師孤負侍者
處會得也是無端雪竇云元來不會師云雪峯道底
雲門又云作麼生是侍者孤負國師處粉骨碎身未
報得雪竇云無端無端師云梁生招箭法眼云且去
別時來雪竇云謾我不得師云却是法眼會興化云

一盲引衆盲雪竇云端的瞎師云親言出親口玄覺
徵問僧云甚處是侍者會處僧云若不會爭解恁麼
應覺云汝少會在又云若於此見得去便識玄沙師
云慚惶殺人翠巖芝云國師侍者總欠會在師云猶
較些子投子云抑逼人作麼雪竇云探根漢師云理
長即就復云唯有趙州多口阿師下得箇注脚令人
疑著僧問國師三喚侍者意旨如何州云如人暗中
書字字雖不成文彩已彰雪竇便喝師云且道遮一
喝在國師侍者分上在趙州分上隨後喝一喝復云
若不是命根五色索子斷如何透得遮裏過雪竇云
若有人問雪竇雪竇便打也要諸方檢點師云作賊

人心虛雪竇復有一頌云師資會遇意非輕師云此
語有兩負門無事相將草裏行師云普州人送賊負
汝負吾人莫問師云放待冷來看任從天下競頭爭
師云即今休去便休去若覓了時無了時復云你若
求玄妙解會只管理會國師三喚侍者話那裏是國
師孤負侍者處那裏是侍者孤負國師處有甚麼交
涉鵝王擇乳素非鴨類遮箇便是國師用劒刃上事
爲復只遮些子爲復別更有在一日問紫璘供奉甚
麼處來奉曰城南來國師曰城南草作何色奉曰作
黃色國師乃問童子城南草作何色童子曰作黃色
國師曰只遮童子亦可簾前賜紫對御談玄你道國

師說老婆禪。拖泥帶水得麼。爲復只遮些子。爲復別更有在。一日肅宗帝請看戲。國師曰。檀越有甚心情看戲。法雲圓通禪師曰。且道國師在甚處。著到妙喜。敢問諸人。且道圓通禪師在甚處。著到於斯。見得三老相去不遠。肅宗帝又問。如何是十身調御。國師直拔向佗道。檀越蹋盧頂上行。更問甚麼。十身調御諸人要見忠國師麼。只在你眼睛裏。開眼也。蹉過合眼也。蹉過。旣在眼睛裏。爲甚麼却蹉過。妙喜恁麼道。亦蹉過不少。你更看佗有箇無情說法話。老漢尋常不曾說。今日已是不識好惡。不避口業。盡情爲諸人抖擻。爲佗雪屈。且不得作義理會。僧問。如何是古佛。

心國師曰。牆壁瓦礫。是師云。恁麼答話。若玄妙解路。心不絕命根。不斷大法。不明決定。不敢如此。四楞塌地。一棒一喝。一挨一拶。擊石火閃電光。却易遮般說話。却難入作前所謂家活大門口。大法性寬波瀾闊。命根斷方能如是。僧曰。牆壁瓦礫。豈不是無情。國師曰。是僧曰。無情還說法否。國師曰。常說熾然說無間歇。僧曰。某甲爲甚麼不聞。國師曰。汝自不聞。不可妨佗聞者也。僧曰。未審甚麼人得聞。國師曰。諸聖得聞。僧曰。和尚還聞否。國師曰。我不聞。僧曰。和尚旣不聞。爭知無情。說法。國師曰。賴我不聞。我若聞。則齊於諸聖。汝即不聞。我說法。僧曰。恁麼則衆生無分也。

國師曰我爲衆生說不爲諸聖說僧曰衆生聞後如何國師曰即非衆生師云奇哉你看佗轉轉地不滯在一隅不負佗來問賴我不聞我若聞則齊於諸聖汝即不聞我說法你喚作郎當得麼不是得諸佛諸祖心髓如何轉得你莫喚作無得失遮箇是無得失中有得失有得失中無得失喚作入泥入水騎賊馬趕賊隊借婆帳子拜婆年難奈何又僧問發心出家本擬求佛未審如何用心即得成佛國師曰無心可用即得成佛師云遮僧難容恰如箇鼠黏子相似遮箇老子輭頑又撞著遮僧輭頑黏住便問無心可用阿誰成佛國師曰無心自成佛成佛亦無心僧曰

佛有大不可思議爲能度衆生若也無心阿誰度衆生國師曰無心是真度生若見有生可度者即是有心宛然生滅僧曰今旣無心能仁出世說許多教迹豈可虛言國師曰佛說教亦無心僧曰說法無心應是無說國師曰說即無無即說僧曰說法無心造業有心否國師曰無心即無業今旣有業心即生滅何得無心僧曰無心即成佛和尚即今成佛未國師曰心尚自無誰言成佛若有佛可成還是有心有心即有漏何處得無心僧曰旣無佛可成和尚還得佛用否國師曰心尚自無用從何有僧曰茫然都無莫落斷見否國師曰本來無見阿誰道斷僧曰本來無見

莫落空否國師曰無空可落僧曰有可墮否國師曰
空既是無墮從何立僧曰能所俱無忽有人持刀來
取命爲是有是無國師曰是無僧曰痛否國師曰痛
亦無僧曰痛既無死後生何道國師曰無死無生亦
無道僧曰既得無物自在飢寒所逼若爲用心國師
曰飢即喫飯寒即著衣僧曰知飢知寒應是有心國
師曰我問汝有心心作何體段僧遲疑良久覓心與
飢寒體段了不可得遂依實供通曰心無體段國師
曰汝既知無體段即是本來無心何得言有僧曰山
中逢見虎狼如何用心國師曰見如不見來如不來
彼即無心惡獸不能加害僧曰寂然無事獨脫無心

名爲何物國師曰名金剛大士師喝一喝云好人不
肯做却要屎裏卧僧曰金剛大士有何體段國師曰
本無形段師云何不早恁麼道僧曰既無形段喚何
物作金剛大士國師曰喚作無形段金剛大士僧曰
金剛大士有何功德國師曰一念與金剛相應能滅
殞伽沙劫生死重罪得見殞伽沙諸佛其金剛大士
功德無量非口所說非意所陳假使殞伽沙劫住世
說亦不可得盡遮僧當下大悟如睡夢覺如蓮花開
似遮般底便是金剛圈栗棘蓬你若吞不得透不得
不見古人行履處定起謗無疑透得遮裏方能作大
舟航不著此岸不著彼岸不住中流善知識下得遮

般腳手入得遮般窠窟方始爲得人師家若不具許多差別眼目如心性解路上得箇入處底定不愛擊石火閃電光却愛遮般說話又却錯做實法會了如一機一境一棒一喝上得箇入處底定不愛遮般說話又是錯會了真所謂所見不同互有得失教中所謂菩薩見水如甘露天人見水如瑠璃凡夫見水是水餓鬼見水如膿血是也或有箇愛高禪底衲子出來道妙喜有如是等見耶即向佗道逢人但恁麼舉所以正法眼藏中收僧問忠國師古德云青青翠竹盡是法身鬱鬱黃花無非般若有人不許云是邪說亦有信者云不思議不知若爲國師曰此蓋普賢文

殊境界非諸凡小而能信受皆與大乘了義經意合故華嚴經云佛身充滿於法界普現一切羣生前隨緣赴感靡不周而恒處此菩提座翠竹既不出於法界豈非法身乎又般若經云色無邊故般若亦無邊黃花既不越於色豈非般若乎深遠之言不省者難爲措意又華嚴座主問大珠和尚曰禪師何故不許青青翠竹盡是法身鬱鬱黃花無非般若珠曰法身無像應翠竹以成形般若無知對黃花而顯相非彼黃花翠竹而有般若法身故經云佛真法身猶若虛空應物現形如水中月黃花若是般若般若即同無情翠竹若是法身翠竹還能應用座主會麼主曰不

了此意珠曰若見性人道是亦得道不是亦得隨用而說不滯是非若不見性人說翠竹著翠竹說黃花著黃花說法身滯法身說般若若不識般若所以皆成諍論師云國師主張青青翠竹盡是法身直主張到底大珠破青青翠竹不是法身直破到底老漢將一箇主張底將一箇破底收作一處更無拈提不敢動著佗一絲毫要你學者具眼透國師底金剛圈又吞大珠底栗棘蓬具眼者辨得出不具眼者未必不笑某雖參園悟和尚打失鼻孔元初與我安鼻孔者却得湛堂和尚只是爲人時下刀不緊若是說禪病無人過得嘗思教中有一段因緣殃崛摩羅要千人指

頭作花冠然後登王位已得九百九十九指唯少一指要斷其母指填數佛知其緣熟故往化之殃崛纔舉意欲下刀取母指時忽聞振錫聲遂捨其母指而問佛教化一指曰既是瞿曇在此望施我一指頭滿我所願纔舉刀世尊拽脫便去世尊徐行殃崛急趕不上乃高聲叫曰住住世尊曰我住久矣是汝不住殃崛忽然感悟投佛出家佛却令持鉢至一長者門其家婦人正值產難長者曰瞿曇弟子汝爲至聖當有何法能免產難殃崛曰我乍入道未知此法待我回問世尊却來相報及返具事白佛佛告殃崛汝速去報言我自從賢聖法來未曾殺生殃崛當便奉佛

語往彼告之其婦得聞即免產難師云遮裏使棒使喝掀倒禪牀引經教說理事擊石火閃電光夜半捉烏雞得麼因請益湛堂和尚纔舉起此話湛堂曰你爬著我痒處遮話是金屎法不會如金會得如屎曰豈無方便湛堂曰我有箇方便只是你剗地不會曰望和尚慈悲湛堂曰殃崛云我乍入道未知此法待問世尊未到佛座下佗家生下兒子時如何我自從賢聖法來未曾殺生殃崛持此語未至佗家已生下兒子時如何老漢當時理會不得後因在虎丘看華嚴經至菩薩登第七地證無生法忍云佛子菩薩成就此忍即時得入菩薩第八不動地爲深行菩薩難

可知無差別離一切相一切想一切執著無量無邊一切聲聞辟支佛所不能及離諸諠譁寂滅現前譬如比丘具足神通得心自在次第乃至入滅盡定一切動心憶想分別悉皆止息此菩薩摩訶薩亦復如是住不動地即捨一切功用行得無功用法身口意業念務皆息住於報行譬如有人夢中見身墮在大河爲欲度故發大勇猛施大方便以大勇猛施方便故即便寤寤既寤寤已所作皆息菩薩亦爾見衆生身在四流中爲救度故發大勇猛起大精進以勇猛精進故至此不動地既至此已一切功用靡不皆息二行相行皆不現前此菩薩摩訶薩菩薩心佛心菩

拈心涅槃心尚不現起況復起於世間之心師云到遮裏打失布袋湛堂爲我說底方便忽然現前方知真善知識不欺我真箇是金剛圈須是藏識明方能透得又有箇尊宿喚作洛浦和尚久爲臨濟侍者濟每稱美之謂之臨濟門下一隻箭子便是欺侮人游歷罷直往夾山頂卓菴經年夾山知乃修書遣僧馳到洛浦接得便坐却再展手索僧無對浦便打曰歸去舉似和尚僧回舉似夾山山曰遮僧看書三日內必來若不看書此人救不得師云古人喚作撈攬人不知書中有甚閑言長語洛浦却答佗鉤線三日內果來夾山預令人伺其出菴便燒其居師云只遮便

是金剛圈浦不顧師云成佛作祖須是遮般漢直造夾山方丈不禮拜乃當面叉手而立山曰雞棲鳳巢非其同類出去浦曰自遠趨風乞師一接山曰目前無閣梨此間無老僧浦便喝山曰住住且莫草草忽忽雲月是同谿山各異截斷天下人舌頭即不無閣梨爭教無舌人解語師云洛浦却低頭思量遮一道真言理會不得被夾山劈脊便打穿了鼻孔遂承嗣夾山後來示衆道末後一句始到牢關把斷要津不通凡聖須知上流之士不將佛祖見解貼在額頭上如靈龜負圖自取喪身之本師云佗悟後便解明佗遮一道真言遮此三子藥頭不問雲門下臨濟下曹洞

下法眼下瀉仰下大法若不明各宗其宗各師其師
各父其父各子其子只管理會宗旨熱大不緊老漢
在衆中時嘗請益一尊宿禪門中說有語中無語無
語中有語尊宿爲我引證云有語中無語路逢死蛇
莫打殺無底籃子盛將歸喚遮箇作有語中無語又
喚作無語中有語如何是有語中無語路逢死蛇莫
打殺如何是無語中有語無底籃子盛將歸只遮一
句便具此兩義路逢死蛇莫打殺是無語中有語無
底籃子盛將歸乃是有語中無語謂既是死蛇更不
消打殺又云如何是同中有異鷲斯立雪非同色如
何是異中有同明月蘆花不似佗我如此說時你便

會得了却濟得甚麼事似遮般底莫要學大法明後
舉一絲毫便一時會得恰似殃崛摩羅因緣湛堂說
底方便我乍入道也使不著佛有神通也使不著既
使不著因甚麼生下兒子若向遮裏見得釋迦老子
即是殃崛摩羅殃崛摩羅即是釋迦老子若也不會
釋迦自釋迦殃崛自殃崛不干產難人家事乃合掌
云即將上來舉揚般若所有一言一句契佛契祖底
功德奉爲計議錢公薦室安人呂氏伏願出此沒彼
常爲般若之親姻捨身受身永作菩提之眷屬召大
衆云還委悉麼若欲直下便休去莫記我今說底喝
一喝

傳經幹請普說師云經幹道友妙喜初不相識去歲經由衡陽特來相訪一見便如故人蓋爲信得此段大事因緣及何以故豈不見華嚴會上智首菩薩問文殊師利菩薩言佛子菩薩云何得無過失身語意業等事文殊答以善用其心則獲一切勝妙功德爲說行住坐卧四威儀中一百四十大願謂之無濁亂清淨行大功德此功德皆從信地而發故文殊普爲已發信心者作不請友以偈問賢首菩薩曰我今已爲諸菩薩說佛往修清淨行仁亦當於此會中演暢修行勝功德賢首菩薩以偈答之其中曰以法威力現世間則獲十地十自在亦是說初發心從信地起

之義末後善財到毗盧樓閣前彌勒爲說一百二十種菩提心亦是此義其中有一種喻曰如師子王哮吼師子兒聞皆增勇健餘獸聞之即皆竄伏佛師子王菩提心吼應知亦尔諸菩薩聞增長功德有所得者聞皆退散亦是此義既有信根即是成佛基本忽地與現行相應便證阿耨多羅三藐三菩提如釋迦老子初在正覺山前舉頭見明星出現忽然悟道遂乃歎曰奇哉一切衆生具有如來智慧德相但以妄想執著而不證得謂上至十方諸佛下至六道四生含蠢蠕動於我悟處以平等印一印印定更無差別你看黃面老子纔悟了便見得如此廣大然後興慈

運悲於生死海不著此岸不著彼岸不住中流而能
運載此岸衆生到於彼岸不住生死中流遮箇道理
亦不出自家信種所以無盡居士注海眼經題說佛
成就云始覺合本之謂佛佗雖是箇俗人然却見得
徹識得根本謂始覺時從明星上起信忽然覺悟自
性本來是佛大地有情更無差別無盡喚作始覺合
本覺方始成佛參禪人能怎麼辨白得了然後休歇
身心識取本來面目不要鹿心古聖得了便於得處
滅却生滅心亦不住在寂滅地謂之寂滅現前於寂
滅地獲二殊勝一者上合十方諸佛與佛如來同一
慈力二者下合六道衆生與諸衆生同一悲仰前所

云興慈運悲救拔惡道是也衆生爲不覺故輪轉生
死先覺之士若無慈悲如何得衆生界空信知佛恩
難報今日經幹道友請妙喜普說不獨爲先考承事
追修而已要與現前一衆說些禪病故柳子厚以天
台教爲司南言禪病最多誠哉是言天台智者之教
以空假中三觀攝一切法教人把本修行禪無文字
須是悟始得妙喜自十七歲便疑著此事恰恰參十
七年方得休歇未得已前常自思惟我今已幾歲不
知我未託生來南閭浮提時從甚麼處來心頭黑似
漆並不知來處既不知來處即是生大我百年後死
時却向甚麼處去心頭依舊黑漫漫地不知去處既

不知去處即是死大謂之無常迅速生死事大你諸人還曾恁麼疑著麼現今坐立儼然孤明歷歷地說法聽法賓主交參妙喜數兩片皮牙齒敲磕臍輪下鼓起粥飯氣口裏忉忉怛怛在遮裏說說者是聲此聲普在諸人髑髏裏諸人髑髏同在妙喜聲中遮箇境界佗日死了却向甚處安著旣不知安著處則撞入驢胎馬腹亦不知生快樂天宮亦不知禪和子尋常於經論上收拾得底問著無有不知者士大夫向九經十史上學得底問著亦無有不知者離却文字絕却思惟問佗自家屋裏事十箇有五雙不知佗人家事却知得如此分曉如是則空來世上打一遭

將來隨業受報畢竟不知自家本命元辰落著處可不悲哉所以古人到遮裏如救頭然尋師決擇要得心地開通不疑生死然有學而知之者有生而知之者那箇是學而知之者如僧問趙州學人乍入叢林乞師指示州云你喫粥了也未僧云喫粥了州云洗鉢盂去僧於言下忽然大悟當下休歇便知生死去處妙喜常說不易遮僧有力量趙州將二百二十斤擔子一送送在佗肩上遮僧荷得一氣走二百二十里更不回頭如將梵位直授凡庸心裏便怙怙地興得慈力運得悲願此是學而知之者那箇是生而知之者如趙州作沙彌時同本師行脚到南泉值南泉

卧次本師禮拜了趙州方禮拜南泉問云近離甚處
州云近離瑞像泉云還見瑞像麼州云瑞像則不見
面前只見卧如來南泉遂起問你是有主沙彌無主
沙彌州云是有主沙彌泉云那箇是你主若是如今
禪和家便近前彈指打箇圓相喝一喝拍一拍拂袖
便行放出遮般惡氣息你看佗趙州緩緩地近前道
孟春猶寒伏惟和尚尊候萬福泉乃喚維那云此沙
彌別處安排次日却來問如何是道南泉也不行棒
也不下喝也不談玄也不說妙也不牽經也不引論
也不舉古人公案亦不說事亦不說理只實頭向佗
道平常心是道爲佗趙州已理會得平常心了便却

問還假趣向也無泉云擬向即乖州云不擬爭知是
道泉云道不屬知不屬不知知是妄覺不知是無記
若真達不疑之道猶如太虛廓然蕩豁豈可於中強
是非耶趙州於言下下了百當南泉道道不屬知不
屬不知圭峯謂之靈知荷澤謂之知之一字衆妙之
門黃龍死心云知之一字衆禍之門要見圭峯荷澤
則易要見死心則難到遮裏須是具超方眼說似人
不得傳與人不得所以圓悟先師說趙州禪只在口
脣皮上難奈佗何如善用兵者不齎粮行就你水草
粮食又殺了你有一秀才問佛不違衆生願是否州
云是才云弟子欲就和尚手中乞取拄杖得否州云

音言
君子不奪人所好才云某甲不是君子州云老僧亦不是佛又一僧問如何是祖師意州乃敲禪牀脚僧云莫只遮便是否州云是則脫取去又一僧問諸方盡向口裏道和尚如何示人州以脚跟打火爐示之僧云莫便是也無州云恰認得老僧脚跟又僧問如何是趙州州云東門南門西門北門僧云某甲不問遮箇州云你問我趙州驛又僧問如何是道州云牆外底僧云某甲不問遮箇道州云你問那箇道僧云某甲問大道州云大道通長安你不得作無事會不得作玄妙會不得作奇特會不得作平常會趙州不在無事上不在玄妙上不在奇特上不在平常上畢

竟在甚麼處具眼者辨取遮老漢有時云未出家披菩提使出家後使得菩提汝諸人被十二時使老僧使得十二時又云佛之一字吾不喜聞佛之一字尚不喜聞達磨灼然是甚老臊胡十地菩薩是擔簦漢等妙二覺是破凡夫菩提涅槃是繫驢轅十二分教是鬼神簿拭瘡膿紙四果三賢初心十地是守古冢鬼你既不到遮箇田地是事理會不得也學人鹿走大步便把一句子禪要祇對人且不是遮箇道理所以妙喜室中常問禪和子喚作竹篋則觸不喚作竹篋則背不得下語不得無語不得思量不得卜度不得拂袖便行一切總不得你便奪却竹篋我且許你

奪却我喚作拳頭則觸不喚作拳頭則背你又如何
奪更饒你道箇請和尚放下著我且放下著我喚作
露柱則觸不喚作露柱則背你又如何奪我喚作山
河大地則觸不喚作山河大地則背你又如何奪有
箇舟峯長老云某看和尚竹篋子話如籍沒却人家
財產了更要人納物事妙喜曰你譬喻得極妙我真
箇要你納物事你無從所出便須討死路去也或投
河或赴火拌得命方始死得死了却緩緩地再活起
來喚你作菩薩便歡喜喚你作賊漢便惡發依前只
是舊時人所以古人道懸崖撒手自肯承當絕後再
蘇欺君不得到遮裏始契得竹篋子話復說偈云佛

之一字尚不喜有何生死可相關當機覲面難回互
說甚楞嚴義八還

悅禪人請普說僧問臨濟示衆云有時奪人不奪境
有時奪境不奪人有時人境兩俱奪有時人境俱不
奪如何是奪人不奪境師云三千里外絕諸訛進云
如何是奪境不奪人師云拔出眼中楔進云臨濟道
煦日發生鋪地錦嬰孩垂髮白如絲未審與和尚答
底是同是別師云咬人屎橛不是好狗進云王令已
行天下徧將軍塞外絕煙塵時如何師云適來猶自
可而今更郎當問十方薄伽梵一路涅槃門未審
王氏今日是生耶是死耶師云生耶死耶進云今古

應無墜分明在目前師云抽却腦後箭進云只如十二時中不依倚一物人來師還接否師云喚甚麼作一物進云不可重說偈言師云礙塞殺人乃云生耶死耶非得非失不道不道有理有事若向有理有事處得箇入處只在教乘裏頭出頭沒若於非得非失處得箇入處敢保諸人十二時中未有安身立命處既未有安身立命處則不知王氏落處若知得王氏落處即知自己安身立命處且道王氏即今是生耶是死耶是不生耶是不死耶若道不生爭奈死何若道不死爭奈生何若道亦生亦死又是戲論說若道非生非死又是相違說直饒離四句絕百非直下

如明鏡當臺明珠在掌胡來現胡漢來現漢當人各腳跟下淨裸裸明歷歷生死如夢幻空花去來如浮雲水月猶未是徹頭處縱饒如實見得昔日之生本不曾生今日之滅本不曾滅亦是無夢說夢何以故生而不生鏡裏之形滅而不滅水中之月正當恁麼時那裏是王氏出身處若委悉得去王氏只今與諸人把手共行同入如來大寂滅海其或未然有寒暑兮促君壽有鬼神兮妬君福復云遮箇是近悅上座爲母王氏請妙喜老漢說法底意旨且法作麼生說不見道法不可見聞覺知若行見聞覺知是則見聞覺知非求法也見聞覺知既不可以入道莫是

不見不聞不覺不知便是麼良久高聲云更是箇甚麼妙喜盡力說只說得到遮裏此事決定不在言語上所以從上諸聖次第出世各各以善巧方便怱怱怱唯恐人泥在言語上若在言語上一大藏教五千四十八卷說權說實說有說無說頓說漸豈是無言說因甚麼達磨西來却言單傳心印不立文字語言直指人心見性成佛因何不說傳玄傳妙傳言傳語只要當人各各直下明白本心見自本性事不獲已說箇心說箇性已大段狼藉了也若要拔得生死根株盡切不得記我說底縱饒念得一大藏教如餅瀉水喚作運糞入不名運糞出却被遮些子障却自

已正知見不得現前自己神通不能發現只管弄目前光影理會禪理會道理會心理會性理會奇特理會玄妙大似掉棒打月枉費心神如來說爲可憐愍者古人凡有一言半句設一箇金剛圈栗棘蓬教伊吞教伊透若是箇英靈獨脫出情塵超理性者金剛圈栗棘蓬是甚麼弄糊獃家具祭鬼神茶飯蓋你不能一念緣起無生只管一向在心意識邊作活計纔見宗師動口便向宗師口裏討玄討妙却被宗師倒翻筋斗自家本命元辰依舊不知落處脚跟下黑漫漫地依前只是箇茶桶只如適來上座問奪人不奪境一段話只知冊子上念將來如法答佗又理會不

得問一段未了又問一段恰如村人打傳口令相似
我今不惜口業爲你諸人葛藤注解一徧臨濟一日
示衆云有時奪人不奪境有時奪境不奪人有時人
境兩俱奪有時人境俱不奪會麼良久左右顧視便
下座遮箇便是金剛王寶劔我昨日說底將蜈蚣毒
蛇蝎子并諸雜毒貯在一甕裏你試將三就中拈一
箇不毒底出來看若拈得出不妨於此事有少分相
應若拈不出自是你根性遲鈍夙無靈骨也怪妙喜
不得臨濟當時道遮幾句閑言長語面目現在自是
你不會看得出你若領得此意自從胡亂後三十年
不少鹽醬鐘樓上念讚牀腳下種菜之類不著問人

一一自知下落古人垂箇方便豈是閑開口須知爛
泥裏有利當時有箇克符道者理會得臨濟意便出
來問如何是奪人不奪境臨濟當時不知那裏得許
多閑言長語闕湊得恰好便道煦日發生鋪地錦嬰
孩垂髮白如絲諸人還會麼煦日發生鋪地錦是境
嬰孩垂髮白如絲是人此兩句一句存境一句奪人
克符又作頌曰奪人不奪境緣自帶諸訛師云有甚
麼諸訛擬欲求玄旨思量反責麼師云誣人之罪驪
珠光燦爛蟾桂影婆娑師云何不早恁麼道覲面無
差互還應滯網羅師云依稀似曲纔堪聽又被風吹
別調中此頌大槩在驪珠光燦爛蟾桂影婆娑之上

蓋此兩句是境學者問不奪境擬欲求玄旨思量反責麼大意只是不可思量擬議思量擬議者人也蹉却覲面相呈一著子即被語言網羅矣克符此頌專明煦日發生鋪地錦所以有驪珠光燦爛蟾桂影婆娑之句乃是存境而奪人故曰覲面無差互還應滯網羅奪人之義醍醐毒藥一道而行具眼者方能辨別又問如何是奪境不奪人答云王令已行天下徧將軍塞外絕煙塵師云王令已行天下徧是奪了境將軍塞外絕煙塵是存人而不奪頌曰奪境不奪人尋言何處真師云也須閑處作隄防問禪禪是妄究理理非親師云好事不如無日照寒光澹山遙翠色

新師云貧兒思舊債直饒玄會得也是眼中塵師云自起自倒你要會日照寒光澹山遙翠色新麼此兩句是境直饒玄會得也是眼中塵便奪了也其餘人境兩俱奪人境俱不奪盡是依語就學家問處答又問如何是人境兩俱奪答云并汾絕信獨處一方便有人境兩俱奪面目頌曰人境兩俱奪從來正令行師云已落第二不論佛與祖那說聖凡情師云買石得雲饒擬犯吹毛劍還如值木盲師云識法者懼進前求妙會特地斬精靈師云前箭猶輕後箭深正令既行不留佛祖到遮裏進之退之性命都在師家手裏如吹毛劍不可犯其鋒又問如何是人境俱不奪

答云王登寶殿野老謳歌頌曰人境俱不奪思量不偏師云會麼是法住法位主賓言不異師云世間相常住問答理俱全師云添一毫不得減一毫不得蹋破澄潭月師云猶有遮箇在穿開碧落天師云勞而無功不能明妙用師云動著即錯淪溺在無緣師云却依舊處著遮箇是適來上座請益底公案謂之四料揀你若分明理會得臨濟意但向佗當時垂示處看如何看山僧有時奪人不奪境有時奪境不奪人有時人境兩俱奪有時人境俱不奪若恁麼便是你若作山僧有時奪人不奪境有時奪境不奪人有時人境兩俱奪有時人境俱不奪便不是了也所

以五祖師翁有言如何是祖師西來意庭前栢樹子恁麼會便不是了也如何是祖師西來意庭前栢樹子恁麼會方始是你諸人還會麼遮般說話莫道你諸人理會不得妙喜也自理會不得我此門中無理會得無理會不得蚊子上鐵牛無你下背處須信古人垂慈則有法無法不垂慈道眼未開大法未明豈免向佗人口裏覓禪覓道覓玄覓妙覓得了唯恐人知及至說時又恐說盡了末後無可說遮箇是無限量底法你以有限量心擬窮佗落處且莫錯只如世尊在靈山會上百萬眾前拈花普示獨迦葉破顏微笑何曾怕人知又何曾密室裏傳授來我遮裏禪許

你衆人聞不許你衆人會如上所解注者四料揀你
諸人齊聞齊會了臨濟之意果如是乎若只如是臨
濟宗旨豈到今日你諸人聞妙喜說得落將謂止如
此我實向你道此是第一等惡口若記著一箇元字
腳便是生死根本也你諸人諸方學得底玄中又玄
妙中又妙是甚麼屎禪一向望在皮袋裏將謂實有
恁麼事莫錯諸上座你真箇要參妙喜禪盡將諸方
學得底掃向佗方世界百不知百不會虛却心來共
你理會復說偈云無諸比丘名近悅爲母王氏請普
說妙喜便登曲录牀忉忉怛怛恣饒舌從來法本離
言詮不假思量與分別說甚地獄及天堂四聖六凡

俱泯絕縱有魔王欲作難金剛寶劔當頭截王氏養
子要參禪只遮一念永不滅彈指頓明諸法門釋迦
彌勒齊超越還如塗毒鼓當軒一擊聞之皆腦裂無
邊煩惱悉蠲除夙業舊殃湯沃雪末後一句爲重宣
凝然萬里一條鐵喝一喝

禮侍者斷七請普說僧問臨濟正法眼藏向瞎驢邊
滅未審和尚正法眼藏向阿誰邊滅師云刹竿頭上
禮西方進云學人只得瞻之仰之師云瞎進云只如
和尚室中道喚作竹篋則觸不喚作竹篋則背不得
下語不得無語遂以坐具打地一下云學人爲蛇畫
足却請和尚頭上安頭師云自起自倒得人憎進云

也要和尚相委悉師云切忌轉裏動指頭進云還有人處也無師云無進云却較些子師云換却你眼睛乃云喚作竹篋則觸不喚作竹篋則背不得下語不得無語不得思量不得擬議正當恁麼時釋迦老子達磨大師雖有鼻孔直是無出氣處且道遮一則公案有甚長處還委悉麼遇貴則賤遇賤則貴若向貴賤處著到更須買草鞵行腳始得所以道不可以有心求不可以無心得不可以語言造不可以寂默通雖然如是如天普蓋似地普擎全放全收全殺全活妙喜恁麼道也不離遮箇消息正如適來禪客以坐具打地一般乃拍禪牀一下云且道明甚麼邊

事斯辰即有當菴比丘了賢謹將近禮者俗家寄來衣物估唱請妙喜老漢舉揚宗旨奉為近禮侍者斷七之辰莊嚴報地可惜遮兄弟方始於竹篋子話有箇發明處而今已是說前年話一日問佗喚作竹篋則觸不喚作竹篋則背如何渠答不得却曰望和尚為某作箇方便指示山僧向佗道你是福州人我說箇喻向你如將名品荔枝和皮殼一時剥了以手送在你口邊只是你不解吞渠聞之不覺失笑曰和尚吞著即禍事過得幾時又問佗前日吞了底荔枝只是你不知滋味渠曰若知滋味轉見禍事我愛佗遮兩轉語所謂從門入者不是家珍信知宗師家無

實法與人且如世間工巧技藝有樣子便做得若是遮一解須是自悟始得得之於心應之於手若未得箇安樂處一向求知見覓解會遮般雜毒纔入心如油入麪求取不出縱取得出亦費料理此事如青天白日元無障礙却被遮些雜毒障却所以於法不得自在老漢常愛真淨和尚道如今人多長得箇身心寂滅前後際斷休去歇去一念萬年去似古廟裏香爐去冷湫湫地去便爲究竟殊不知却被此勝妙境界障蔽自己正知見不能現前神通光明不能發露或又執箇一切平常心是道以爲極則天是天地是地山是山水是水僧是僧俗是俗大盡二十日小盡

二十九凡百施爲須要平常一路子以爲穩當定將去合將去更不敢別移一步怕墮坑落漸長時一似雙盲底人行路一條拄杖子寸步拋不得緊把著憑將去步步依倚一日若道眼豁開頓覺前非拋却杖子撒開兩手十方蕩蕩七縱八橫東西南北無不可可到遮裏方得自在如今人能有幾箇放得杖撒得手昔因新開真淨和尚語錄其時我老和尚在五祖堂中作首座五祖一日廊下見僧把一冊文字祖曰你手中是甚文字僧曰是真淨和尚語錄祖遂取讀即讚歎曰慚愧末世中有恁地尊宿乃喚首座我老和尚時在後架洗轡聞呼狼忙走出來祖曰我得一

本文字不可思議所謂善說法要你試看休去歇去
一念萬年前後際斷諸方如今有幾箇得到遮田地
佗却喚作勝妙境界舊時寶峯有箇廣道者便是遮
般人一箇渾身都不理會都不見有世間事世間塵
勞昧佗不得雖然恁麼却被遮勝妙境界障却道眼
須知到一念不生前後際斷處正要尊宿如水潦和
尚因採藤次問馬祖曰如何是祖師西來意祖曰近
前來向你道水潦纔近前馬祖當曾一蹋蹋倒水潦
忽然大悟不覺起來呵呵大笑祖曰你見箇甚麼道
理潦曰百千法門無量妙義只向一毛頭上便識得
根源去遮箇教中謂之入流亡所所入既寂動靜二

相了然不生纔得箇入處便亡了定相定相既亡不
墮有為不墮無為動靜二相了然不生便是觀音入
理之門佗既悟了便打開自己庫藏運出自己家珍
乃曰百千法門無量妙義只向一毛頭上便識得根
源去又呵呵大笑馬祖知佗已到遮箇田地更不采
佗亦無後語後來住水潦菴禪和家來參佗有百十
衆纔舉揚便賣弄遮一蹋云自從一喫馬師蹋直至
而今笑不休渠又何曾有峯巒疊翠澗水潺潺岸柳
含煙庭花笑日鶯啼喬木蝶舞芳叢底說話來只道
自從一喫馬師蹋直至而今笑不休遮箇便是第一
箇入流亡所動靜二相了然不生底樣子又不見雲

門問洞山近離甚處山曰查渡門曰夏在甚處山曰
湖南報慈門曰幾時離彼山曰八月二十五門曰放
你三頓棒古人淳朴據實祇對自言我此回實從查
渡來有甚麼過便道放我三頓棒大丈夫漢須共遮
老漢理會始得至明日便去問曰昨日蒙和尚放三
頓棒未審過在甚麼處門曰飯袋子江西湖南便恁
麼去洞山忽然大悟更無消息可通亦無道理可拈
出只禮拜而已既悟了便打開自己庫藏運出自己
家珍乃曰佗後向無人煙處住箇草菴不蓄一粒米
不種一莖菜接待十方往來盡與伊出却釘拔却楔
拈却炙脂帽子脫却鶻臭布衫教伊灑灑地作箇衲

僧豈不俊哉雲門曰你身如椰子大開得許大口遮
箇是第二箇入流亡所動靜二相了然不生底樣子
又鼓山晏國師在雪峯多年一日雪峯知其緣熟忽
起搗住曰是甚麼晏釋然了悟唯舉手摇曳而已峯
曰子作道理耶晏曰何道理之有後來楊大年收在
傳燈錄中謂之亡其了心此是第三箇入流亡所動
靜二相了然不生底樣子又灌谿和尚一日見臨濟
濟下繩牀纔擒住谿便云領領遮箇是第四箇入流
亡所動靜二相了然不生底樣子遮箇說似人不得
傳授人不得老漢十七年參也曾零零碎碎悟來雲
門下也理會得些子曹洞下也理會得些子只是不

能得前後際斷後來在京師天寧見老和尚陞堂舉
僧問雲門如何是諸佛出身處門曰東山水上行若
是天寧即不然如何是諸佛出身處薰風自南來殿
閣生微涼向遮裏忽然前後際斷譬如一絛亂絲將
刀一截截斷相似當時通身汗出雖然動相不生却
坐在淨俚俚處得一日去入室老和尚曰也不易你
到遮箇田地可惜你死了不能得活不疑言句是爲
大病不見道懸崖撒手自肯承當絕後再蘇欺君不
得須信有遮箇道理老漢自言我只據如今得處已
是快活更不能理會得也老和尚却令我在擇木寮
作不釐務侍者每日同士大夫須得三四回入室只

舉有句無句如藤倚樹纔開口便道不是如是半年
間只管參一日同諸官負在方丈藥石次我只把著
在手都忘了喫食老和尚曰遮漢參得黃楊木禪却
倒縮去我遂說箇譬喻曰和尚遮箇道理恰如狗看
著熱油鐺相似要舐又舐不得要捨又捨不得老和
尚曰你喻得極好只遮箇便是金剛圈栗棘蓬一日
因問老和尚見說和尚當時在五祖曾問遮箇話不
知五祖和尚如何答老和尚不肯說老漢曰和尚當
時不可獨自問須對大衆前問如今說又何妨老和
尚乃曰我問有句無句如藤倚樹時如何祖曰描也
描不成畫也畫不就又問忽遇樹倒藤枯時如何祖

白相隨來也。老漢纔聞舉便理會得。乃曰：某會也。老和尚曰：只恐你透公案未得。老漢曰：請和尚舉。老和尚遂連舉一絡索。誑訛公案被我三轉兩轉截一箇。如太平無事時得路便行，更無滯礙。老和尚曰：如今方知道我不謾你。我既會了，却倒疑著幾箇禪頭。乃問老和尚：老和尚曰：我箇禪如大海相似，是你將得箇大海來傾取去，始得。若只將得鉢盂來盛得些子去，便休。是你器量只如此，教我怎奈何？能有幾箇得到你田地？舊時只有一箇璟上座與你一般，只是死了過得幾時，便舉我立僧。後來在雲居首座寮，夜間常與兄弟入室。老和尚愛來聽，有時入室了，却上方

丈見老和尚同在火爐頭坐。老和尚曰：或有箇禪和子得似老僧，你又如何支遣？老漢曰：何幸如之。正如東坡說作劄子，得一箇肥漢，剛我却倒與老和尚入室，被我撥得上壁。老和尚呵呵大笑，思量遮老和尚粉骨碎身，亦未能報得。因禮上座，聞老漢舉福州人喫荔枝有箇弊地處，所以說到遮裏遮。兄弟在叢林中規行矩步，無衲子之過，可惜尺頭短。然打箇筋斗出來，決定昧佗不得。有一則古話舉似大眾，教中道：吾不見時，何不見？吾不見之處，若見不見？自然非彼不見之相，若不見吾不見之地，自然非物。云何非汝？後來湛堂和尚頌曰：老胡徹底老婆心，爲阿難陀意。

轉深韓幹馬嘶青草渡戴嵩牛卧綠楊陰妙喜亦有
箇頌子雖不甚文彩却不在湛堂之下荒田無人耕
耕著有人爭風吹荷葉動決定有魚行

師紹興二十六年三月十一日於臨江軍新淦縣東
山寺被旨還僧謝恩罷拈香祝聖畢乃就座
云青氈本是吾家物今日重還舊日僧珍重聖恩
何以報萬年松上一枝藤遂拈起拄杖云一枝藤在
遮裏且報恩一句作麼生道若也道得粉骨碎身未
足酬一句了然超百億其或未然山僧不免爲諸人
道破長將日月爲天眼指出須彌作壽山

新淦縣衆官請普說僧問聖恩已受僧相再圓學

人上來乞師指示重新底佛法師云雨過谿光澹雲
開嶽色新進云恁麼則龍圖增久固佛日轉光輝師
云一道舊行路高下自分明進云只如大顛叩齒韓
文公直下知歸黃檗安名裴相國便知落處未審和
尚今日與知縣朝議相見有何指示師云兩眼對兩
眼進云莫便是指示也無師云一任鑽龜打瓦僧禮
拜師乃云問得亦好不問更親何故聲前一路千
聖不傳學者勞形如猿捉影可中有箇英靈漢恁麼
不恁麼聊聞舉著剔起便行猶在葛藤窠裏直得內
無所證外無所修似地擎山如石含玉亦未是衲僧
放身命處敢問法筵大衆作麼生是衲僧放身命處

若也知得塵塵念念皆無空闕折旋俯仰盡在其中
正當恁麼時畢竟是誰家風月還委恁麼千聖不知
何處去倚天長劍逼人寒復云遮箇是知縣朝議
今日率諸同官泊寄居賢士大夫同來隨喜某披剃
請說法底意旨此一段因緣問佛有因況某自居衡
梅首尾十七年今日不覺不知一來新淦同此法會
豈非前報世中曾在靈山會上同為聽法之人元來
說法自有時處若時節因緣未會說法不成所以釋
迦老子說法三百六十餘會皆立時處何謂時處豈
不見圓覺經末上云如是我聞一時婆伽婆入於禪
通大光明藏三昧正受只遮箇便是今日說法底時

節所以道欲識佛性義當觀時節因緣時節若至其
理自彰不見天台智者大師因讀法華經至藥王菩
薩焚身處云是真精進是名真法供養如來於此豁
然前後際斷便證法華三昧於三昧中見靈山會上
釋迦老子與百萬大衆儼然未散如今說與人若是
不曾入得遮般境界刻地不信何故智者自是陳隋
時人與釋迦老子相去二千年如何因是真精進是
名真法供養如來便於法華三昧中見靈山一會儼
然未散為復是謾人耶是假說耶此事唯證乃知難
可測須知妙喜今日說法與釋迦老子在靈山會上
說法無異與智者大師在南嶽證得是真精進是名

真法供養如來亦無異真實證者必不相欺未證者
一似說夢所以道過去一切劫安置未來今未來現
在劫回置過去世以海印三昧一印印定更無透漏
無去無來無前無後非但妙喜一人如是判府郎中
亦如是非但判府郎中如是判縣朝議與諸同官寄
居賢士大夫亦如是非但判縣朝議與諸同官寄居
賢士大夫如是乃至現前若僧若俗若貴若賤亦如
是如是之法在天同天在人同人應以佛身得度者
即現佛身而為說法應以宰官身乃至婆羅門婦女
身得度者悉現其身而為說法此是一味清淨平等
法門若向遮裏明得各人本地風光本來面目方知

一大藏教五千四十八卷句句不說別事無常迅速
莫作等閑所以道努力今生須了却莫教末劫受餘
殃人身難得為貴人復難不見釋迦老子說四十二
章經裏面有二十難謂貧窮布施難豪貴學道難有
勢不臨難就中有箇拌命不死難你諸人還會麼若
拌得命無有不死者如何說不死底道理若會得遮
箇方始把二十難一翻翻轉來總是易底事拌命不
死也易貧窮布施也易豪貴學道也易有勢不臨也
易若悟即易不悟即難然難易兩字亦不干本地風
光本來面目事何故此箇法門本無難本無易若能
向不難不易處急著眼看外息諸緣內心無喘方知

本無難易底法。如今聰明靈利底人，不能便悟病在
於何。却爲心意識先行，被心意識障却。自己光明塞
却行路進步不得。所以遮裏使聰明靈利不著，要須
內不放出，外不放入，內不放出，即是內心無喘。外不
放入，即是外息。諸緣內心既定，則諸緣亦定。故曰：那
伽常在定，無有不定時。遮一段大事，因緣大底如是。
若能如是信，如是解，如是修，如是證，則三世諸佛即
是汝諸人。汝諸人即是三世諸佛，無古無今，同一解
脫。世間有如此殊勝之事，可惜百姓日用而不知。然
今日一會，亦非小緣。又承諸山禪師洎諸善男信女
同此聽法，伏願一聞千悟，得大總持，一歷耳根，永爲

道種久立伏惟珍重

錢計議請普說師云：法不可見，聞覺知。若行見聞覺
知，是則見聞覺知非求法也。既離見聞覺知，外却喚
甚麼作法到遮裏？如人飲水，冷煖自知。除非親證，親
悟方可見得。若實曾證悟底人，拈起一絲毫頭，盡大
地一時明得。今時不但禪和子，便是士大夫、聰明靈
利、博極羣書底人，箇箇有兩般病。若不著意，便是忘
懷忘懷，則墮在黑山下鬼窟裏。教中謂之昏沈著意，
則心識紛飛；一念續一念，前念未止，後念相續。教中
謂之掉舉，不知有人人腳跟下不沈不掉底一段大
事。因緣如天普蓋，似地普擎，未有世界，早有此段大

事因緣世界壞時此段大事因緣不曾動著一絲毫
頭往往士大夫多是掉舉而今諸方有一般默照邪
禪見士大夫爲塵勞所障方寸不寧怙便教佗寒灰
枯木去一條白練去古廟香爐去冷湫湫地去將遮
箇休歇人你道還休歇得麼殊不知遮箇猢猻子不
死如何休歇得來爲先鋒去爲殿後底不死如何休
歇得此風往年福建路極盛妙喜紹興初入閩住菴
時便力排之謂之斷佛慧命千佛出世不通懺悔彼
中有箇士人鄭尚明極聰明教乘也理會得道藏也
理會得儒教則固是也一日持一片香來妙喜室中
怒氣可掬聲色俱厲曰昂有一片香未燒在欲與和

尚理會一件事只如默然無言是法門中第一等休
歇處和尚肆意詆訶昂心疑和尚不到遮田地所以
信不及且如釋迦老子在摩竭提國三七日中掩室
不作聲豈不是佛默然毗耶離城三十二菩薩各說
不二法門末後維摩詰無語文殊讚善豈不是菩薩
默然須菩提在巖中宴坐無言無說豈不是聲聞默
然天帝釋見須菩提在巖中宴坐乃雨花供養亦無
言說豈不是凡夫默然達磨游梁歷魏少林冷坐九
年豈不是祖師默然魯祖見僧便面壁豈不是宗師
默然和尚因甚麼却力排默照以爲邪非妙喜曰尚
明你問得我也是待我與你說我若說不行却燒一

炷香禮你三拜我若說得行却受你燒香禮拜我也不與你說釋迦老子及先德言句我即就你屋裏說所謂借婆帔子拜婆年乃問你曾讀莊子麼曰是何不讀妙喜曰莊子云言而足終日言而盡道言而不足終日言而盡物道物之極言默不足以載非言非默義有所極我也不曾看郭象解并諸家注解只據我杜撰說破你遮默然豈不見孔夫子一日大驚小怪曰參乎吾道一以貫之曾子曰唯你措大家纔聞箇唯字便來遮裏惡口却云遮一唯與天地同根萬物一體致君於堯舜之上成家立國出將入相以至啓手足時不出遮一唯且喜沒交涉殊不知遮箇道

理便是曾子言而足孔子言而足其徒不會却問曰何謂也曾子見佗理會不得却向第二頭答佗話謂夫子之道不可無言所以云夫子之道忠恕而已矣要之道與物至極處不在言語上不在默然處言也載不得默也載不得公之所說尚不契莊子意何況要契釋迦老子達磨大師意耶你要理會得莊子非言非默義有所極麼便是雲門大師拈起扇子云扇子教跳上三十三天築著帝釋鼻孔東海鯉魚打一棒兩似盆傾你若會得雲門遮箇說話便是莊子說底曾子說底孔子說底一般渠遂不作聲妙喜曰你雖不語心未伏在然古人決定不在默然處坐地明

矣。你適來舉釋迦掩室維摩默然。且看舊時有箇座主喚作肇法師。把那無言說處說出來。與人云。釋迦掩室於摩竭淨名杜口於毗耶。須菩提唱無說以顯道。釋梵絕聽而雨花。斯皆理爲神御。故口以之而默。豈曰無辯辯所不能言也。遮箇是理與神忽然相撞。著不覺到說不得處。雖然不語其聲如雷。故云。豈曰無辯。蓋辯所不能言也。遮裏世間聰明辯才用一點。不得到得恁麼田地。始是放身捨命處。遮般境界。須是當人自證自悟。始得。所以華嚴經云。如來宮殿無有邊。自然覺者處其中。此是從上諸聖大解脫法門。無邊無量。無得無失。無默無語。無去無來。塵塵尔

刹刹尔。念念尔。法法尔。只爲衆生根性狹劣。不到三教聖人境界。所以分彼分此。殊不知境界如此廣大。却向黑山下鬼窟裏默然坐地。故先聖訶爲解脫深坑。是可怖畏之處。以神通道眼觀之。則是刀山劍樹。鑊湯鑪炭。裏坐地一般。座主家尚不滯在默然處。況祖師門下客。却道纔開口便落。今時且喜沒交涉。尚明不覺作禮。妙喜曰。公雖作禮。然更有事在。至晚間來入室。乃問佗。今年幾歲。曰。六十四。又問你六十四年前。從甚麼處來。渠開口不得。被我將竹篦劈脊打出去。次日又來室中。曰。六十四年前。尚未有昂在。如何和尚却問昂從甚麼處來。妙喜曰。你六十四年前

不可元在福州鄭家只今遮聽法說法一段歷歷孤明底未生已前畢竟在甚麼處曰不知妙喜曰你若不知便是生大今生且限百歲百歲後你待飛出三千大千世界外去須是與佗入棺材始得當尔之時四大五蘊一時解散有眼不見物有耳不聞聲有箇肉團心分別不行有箇身火燒刀斫都不覺痛到遮裏歷歷孤明底却向甚麼處去曰昂也不知妙喜曰你既不知便是死大故曰無常迅速生死事大便是遮箇道理遮裏使聰明也不得記持也不得我更問你平生做許多之乎者也臘月三十日將那一句敵佗生死須是知得生來死去處分曉始得若不知即

是愚人渠方心伏從此遂救得佗不坐在無言無說處肯來遮下做工夫今日一會同此聽法須知人人有此一段大事因緣亘古亘今不變不動也不著忘懷也不著著意但自時時提撕妄念起時亦不得將心止遏止動歸止止更彌動只就動止處看箇話頭便是釋迦老子達磨大師出來也只是遮箇僧問趙州狗子還有佛性也無州云無你措大家多愛穿鑿說道遮箇不是有無之無乃是真無之無不屬世間虛豁之無恁麼說時還敵得佗生死也無既敵佗生死不得則未是在既然未是須是行也提撕坐也提撕喜怒哀樂時應用酬酢時總是提撕時節提撕來

提撕去沒滋味。心頭恰如頓一團熱鐵。相似那時便是好處。不得放捨。忽然心花發明。照十方刹。便能於一毛端。現寶王刹。坐微塵裏。轉大法輪。汝等諸人。聞恁麼說話。往往心裏道。妙喜老漢。搖唇鼓舌。說得也相似。不知佗肚裏如何。須知妙喜說得底。便是行得底。更無兩般。所以西天第十三祖迦毗摩羅尊者。欲求一弟子。繼紹祖位。謂深山窮谷中。必有高人居止。因往求之。故知非但弟子求師。切師求弟子。亦切遂入山。果見一人出迎曰。深山孤寂。龍蟒所居。大德至尊。何枉神足。祖曰。吾非至尊。來訪賢者。彼默念曰。比師得決定性。明道眼。不是大聖。繼真乘否。祖曰。汝雖

心語。吾已意知。但辨出家。何慮吾之不聖。彼聞已悔。謝於是投祖出家。即第十四祖龍樹是也。今時學道者。多不自疑。卻疑佗人。所以道大疑之下。必有大悟。且道悟得箇甚麼。良久云。我不敢輕於汝等。汝等皆當作佛。

鄭成忠請普說師云。平江信士鄭偲。知有此段大事。因緣得得來。見妙喜要聞般若。若所將供養真身舍利寶塔。洎齋雲堂清淨禪衆。請普說功德。不爲別事。專用回向無上佛果。菩提觀其發心。亦已廣大。只遮一念廣大之心。能變大地作黃金。攪長河爲酥酪。有者不信。遮般說話。多執事難理。如富樓那執相難性問。

卅尊曰若地性徧云何容水水性周徧火則不生復云何明水火二性俱徧虛空不相陵滅卅尊地性障礙空性虛通云何二俱周徧法界去遮裏執相生疑是故釋迦老子先爲阿難說性水真空性空真水乃至地水火風一周徧法界隨衆生心循業發現嘗記得山僧往年行腳將入京師到鄧州天寧有蔡州道士忘其姓名以醫來南陽一日見佗教人來藏司借寶積華嚴二經山僧竊知其爲佳士翌日相見與之說話果然契合因問所以借經之意曰某粗聽好人說話來若要理會本命元辰下落須還釋迦老子始得話間忽問山僧佛具正徧知世界上事一一說

盡何故不曾見說金木水火土之所緣起吾師有所聞見無惜開示方是時自家漆桶未破未暇理會遮般底只向佗道藏經中莫須說著某尚居學地方要見人二俱懣懣而休逮到夷門打發此事了因讀楞嚴經元來裏面說得極分曉佛謂富樓那曰同異擾亂相待生勞勞又發塵自相渾濁由是引起塵勞煩惱起爲卅界靜成虛空虛空爲同卅界爲異彼無同異真有爲法覺明空昧相待成搖故有風輪執持卅界由是而知卅界成就因風輪所持蓋風性動搖動搖不息忽生堅礙故曰因空生搖堅明立礙彼金寶者明覺立堅故有金輪保持國土蓋風與金二物相

觸於中生火故曰堅覺寶成搖明風出風金相摩故有火光爲變化性寶明生潤火光上烝故有水輪含十方界火騰水降交發立堅濕爲巨海乾爲洲渾以是義故彼大海中火光常起彼洲渾中江河常注水勢劣火結爲高山是故山石擊則成燄融則成水土勢劣水抽爲草木是故林藪遇燒成土因絞成水交妄發生遞相爲種以是因緣世界相續看佗釋迦老子恁麼說金木水火土可殺分曉惜乎不復見此道士待點似佗元來看教乘文字也要大法明後自然不費力自家參得禪了一把來看便見得富樓那執相難性又見如來爲阿難就性上說地水火風一一

清淨本然周徧法界曾中了無疑滯如今心地未明底不免疑道世界從甚麼處起將來却向甚麼處滅爲復先有世界爲復先有人若道先有世界古德不應云三界唯心所現萬法唯識所變若道先有人既未有世界人却在甚麼處安頓遮些子不妨被佗窒礙說先有世界也不是先有人也不是大法一明不著排遣自然分曉適來所謂變大地作黃金攪長河爲酥酪不是差事以至芥子納須彌須彌納芥子之類亦非假於佗術只如須彌納芥子則固是芥子裏面如何著得一座須彌山到遮裏也須親見一回始得遮一段事人人本有各各天真只爲無始時來無

明業識所覆所以不能現前却去外頭別覓家舍尋常室中問兄弟不是心不是佛不是物是甚麼末問時幸自在家裏坐纔問他是甚麼便離却本位走出門前譬如問人你在那裏云在家裏却問他屋裏家兒事子便忘却家去外面討言語來祇對所謂差之毫釐失之千里若要真實理會此事決定不在言語上今時學者出遮幾路不得向他道不在言語上便去機境上作解會又向道不在機境上便去舉起處承當不是心不是佛不是物舉了便會了圓悟先師常說近來諸方盡成窠窟五祖下我與佛鑑佛眼三人結社參禪如今早見漏逗出來也佛鑑下有一種

作狗子叫鶻鳩鳴取笑人佛眼下有一種觀燈籠露柱指東畫西如眼見鬼一般我遮裏且無遮般病痛山僧曰大好無病痛先師曰何謂山僧曰擊石火閃電光引得無限人弄業識舉了便會了豈不是佛法大窠窟先師不覺吐舌乃曰莫管他我只以契證為期若不契證斷定不放過山僧曰說契證即得第恐後來只恁麼傳將去舉了便會了硬主張擊石火閃電光業識茫茫未有了日先師深以為然更有一般底說靜是根本悟是枝葉靜得久自然悟去山僧敢道佗亂道又引淨極光通達為證且莫錯會好先聖不奈何說箇淨極光通達寂照含虛空譬如良醫應

病與藥如今不信有妙悟底返道悟是建立豈非以藥爲病乎世間文章技藝尚要悟門然後得其精妙況出世間法只恁麼了得遮裏一千二百衲子箇箇有一知半解每來室中道得諦當者甚衆跳得兩跳後更與一拶便去不得蓋卒未能拌身捨命所以道懸崖撒手自肯承當絕後再穌欺君不得莫道無恁麼事嘗記得張無盡有言先佛所說於一毛端現實寶王刹坐微塵裏轉大法輪是真實義法華會上多寶如來在寶塔中分半座與釋迦文佛過去佛現在佛同坐一處實有如是事非謂表法天台智者大師讀法華經至是真精進是名真法供養如來悟得法華

三昧見靈山一會儼然未散山僧常愛老果和尚每提唱及此未嘗不歡喜踊躍以手搖曳曰真箇有恁麼事不是表法你輩冬瓜瓠子那裏得知蓋佗根本下明但拙於語言三昧發其要妙尔此所謂唯證乃知難可測今日鄭成忠請山僧普說之意要聞禪和子做工夫底道理不見雲門道不可說時即有不說時便無商量時便有不商量時便無只如不商量時又是箇甚麼怕你不曾又隨後道更是箇甚麼遮般尊宿慈悲之故爲人痛的的地山僧在衆日瀉仰曹洞雲門法眼下都去做工夫來臨濟下則固是後來方知道悟則事同一家不悟則萬別千差既同一箇

達磨祖師又何處有許多般差別來如何是佛乾屎
橛遮裏有其麼差別德山見僧入門便棒僧罔措復
云不得作棒會臨濟見僧入門便喝已是兩手分付
擬欲覷捕則眼睛落地了也況復說理說事絲來線
去正是師子咬人狂狗趁塊無常迅速生死事大彈
指便是來生到來但虛却心子細推窮窮來窮去善
念既相續惡念自然不生但如實修行時即因緣到
來自然悟去若不悟說到彌勒佛下生只是說底且
作麼生修行聽取一頌惡念既不生善念常相續諸
波羅蜜門一切自具足

孫通判請普說師云說法不應時總是非時語所以

道未離堦率已降王宮未出母胎度人已畢李長者
著華嚴論乃云此經決定是佛成道十日後說初於
正覺山前從定而起因見明星忽然悟道便見自己
本來面目信知時節若至其理自彰妙喜常思無盡
居士遮一箇人不知幾百生中學般若來今生如此
得大受用所注清淨海眼經說八成就謂如是我聞
一時佛在云理無不如之謂是事無不是之謂如自
來不曾有人如此說蓋爲佗見徹釋迦老子骨髓所
以取之左右逢其原佛初主下一手指天一手拍地
云天上天下唯我獨尊所以云三界獨尊之謂我所
謂我者非人我之我如孟子所謂萬物皆備於我也

心洞十方之謂聞蓋世間人皆以耳聞一切音聲唯
普賢菩薩乃以心聞故經云心聞洞十方生于大因
力多之所宗之謂一且如現前一千大衆從首座數
起自一而之百自百而之千所以言一者多之所宗
也一之所起之謂時遮箇時便是妙心居士請妙喜
爲大衆說法之時也當知此時能該括十方三世乃
至塵沙諸佛六道四生若凡若聖若草若木若有情
若無情乃以拂子擊禪牀一下云盡向遮裏成等正
覺無出此時也又云始覺合本之謂佛言以如今始
覺合於本覺往往邪師輩以無言默然爲始覺以威
音王吼畔爲本覺固非此理旣非此理何者是覺若

全具此豈更有迷若謂無迷爭奈釋迦老子於明星
現時忽然便覺知得自家本命元辰元來在遮裏所
以言因始覺而合本覺如禪和家忽然摸著鼻孔便
是遮箇道理然此事人人分上無不具足昨日因與
妙心居士說令叔尚書文章學問可謂儒林宗工但
聞於此道自以爲難往往士大夫只知所謂佛者千
劫學威儀萬劫修相好乃至三大阿僧祇劫修而後
成云何博地凡夫現行無明爲富貴所折困何時與
道相應纔作是念便是於心意識中推出一座須彌
山一障障了道眼不能明見本地風光本來面目正
所謂所知不是障是障障所知近世士大夫多作此

見如韓子蒼與某在臨川鼻孔厮拄者半年亦不自信每言此一段事吾輩但知歸向則可如何便要入手亦是自作障礙或者更錯會先佛所言大通智勝佛十劫坐道場佛法不現前不得成佛道謂佛道之難成如此殊不知一念普觀無量劫無去無來亦無住如是了知三世事超諸方便成十力釋迦老子纔瞥地後便言奇哉一切衆生具有如來智慧德相但以妄想執著而不證得所謂妄想執著者正說著今時士大夫病痛先德所以指示一切人腳跟下無不圓成無不具足故有父不可以傳子臣不可以獻君之說這使自證自悟匪從人得所以不壞假名而談

實相法華經法師云寂兮寥兮寬兮廓兮分兮別兮上則有君下則有臣父子親其居尊卑異其位起教叙其因然後國分其界人部其家各守其位豈非是法住法位世間相常住者耶佛不云乎應以佛身得度者即現佛身而爲說法應以宰官身乃至長者居士婆羅門比丘比丘尼身得度者悉現其身而爲說法又曰應眼時若干日萬象不能逃影質應耳時若幽谷大小音聲無不足法門既如此殊勝奈何學者多不向此時節領覽乃尔自生退屈正是不信自殊勝甘爲下劣人若是靈利漢便向遮裏提得去方知道一塵纔起大地全收一毛頭師子百億毛頭現千頭萬

頭但識取一頭且那箇是一頭不見南臺和尚聞版聲有頌云善哉三下版知識盡來參既善知時節吾今不再三復以拂子擊禪牀一下云適來所謂盡向遮裏成等正覺是真實義所以韶國師云如來於一切處成等正覺於刀山劍樹上成等正覺於鑊湯鑪炭裏成等正覺於棒下成等正覺於喝下成等正覺然雖如是如人飲水冷煖自知豈不見善財童子至毗盧遮那大樓閣前舉體投地從地而起作是念言此大樓閣是解空無相無願者之所住處是於一切法無分別者之所住處是以一劫入一切劫以一切劫入一切而不壞其相者之所住處是以一佛入一

切佛一切佛入一佛而不壞其相者之所住處乃至不著一切世間窟宅者之所住處何謂世間窟宅便是於無上道自作障礙者若執一切世間窟宅不能捨離則吾輩所謂長者亦莫住院一向杜絕世故乃可得行此道如此則是壞世間相而談實相何道之有常愛東坡爲文章庶幾達道者也縱使未至於道而語言三昧實近之矣人謂是五祖戒和尚後身而不知以何因緣中忘此意第亦暫時不著便者觀其作維摩畫像讚從始至終不死在言下其詞曰我觀衆工工一師人持一藥療一病風勞欲寒氣欲煖肺肝胃腎更相尅挾方諸藥如丘山卒無一藥堪

施用有大醫王拊掌笑謝遣眾工病隨愈言其醫王
遣去眾醫曰爾輩用藥都無是處眾工既去其病隨
愈或問醫王君以何藥而病損乎曰不出眾工之所
用者但彼不善用耳故曰問大醫王以何藥還是眾
工所用者我觀三十二菩薩各以意談不二門而維
摩詰默無語三十二義一時隨我觀此義亦不墮維
摩初不離是說遮箇雖是死蛇解弄却活若彼三十
二人所論真箇負墮時即是無言勝有言情知古人
之意決不如此所以立箇喻云譬如油蠟作燈燭不
以火點終不明忽見默然無語處三十二說皆光燄
佛子上讀維摩經當作是念為正念我觀維摩方丈

室維摩九百萬菩薩三萬二千師子座皆悉容受不
迫迕經中所載此是維摩居士不思議大解脫神通
之力所以借座燈王取飯香積斷取妙喜世界如陶
家輪如持針鋒舉一棗葉蓋真實之理不可以智知
不可以識識故曰又能分布一鉢飯饜飽十方無量
眾斷取妙喜佛世界如持針鋒一棗葉云是菩薩不
思議住大解脫神通力我觀石子一處士麻鞞破帽
露兩肘能使筆端出維摩神力又過維摩詰若言此
畫無實相毗耶城中亦非實佛子若見維摩像應作
是觀為正觀此是東坡說底禪豈不是言語到若非
前世熏習得來爭解恁麼道所以妙喜之意亦欲尚

書公於此事信得及妙心居士請持此語歸舉似令叔恐因妙喜之言直下信得及異日忽然噴地一發便乃截生死流據祖佛位做箇出世閒沒量大人始不負妙喜相期之意妙心居士近日畫得入定觀音以妙喜昔年所作讚題其上蓋在衡陽時因道友蘭庭彥所請當時信意一筆寫成與維摩讚言語雖不同大意相似曰世閒種種音聲相聚以耳聽非目觀一切音聲須以耳聽唯觀音却以眼觀故曰唯此大士眼能觀如何見得曰瞋目諦觀為佛事到遮裏便轉了曰於眼境界無所取眼境界既取不得即眼界寂然眼界既寂滅不可耳界不寂滅所以云耳鼻

舌意亦然善哉心洞十方空六根互顯如是義觀音菩薩以眼聞而普賢菩薩以心聞即此是互顯之義所謂互顯者眼處作耳處佛事耳處作鼻處佛事鼻處作舌處佛事舌處作身處佛事身處作意處佛事於意界中作無量無邊廣大佛事得恁麼受用自在了眼依舊觀色耳依舊聽聲乃至鼻舌身意一一依本分故曰眼色耳聲鼻嗅香身觸意思無差別適來所謂是法住法位世閒相常住是也當以此觀如是觀取此為實成妄想到遮裏又轉了曰若離妄想取實法展轉或亂失本心本心既失隨顛倒不見大士妙色身云何顛倒眼見色隨色轉耳聞聲隨聲轉

是謂衆生顛倒迷已逐物以逐物故不見大士妙色
身無眼耳鼻舌身意此乃教有明文眼耳鼻等既無
其體互顯之義依何而立故曰互顯之義亦寂滅亦
無大士妙色身亦無種種音聲相佛子能作如是觀
永離世間生死苦大凡文字須教說得行若說不行
不成文章適來因論時節因緣所以說善財方立于
樓閣之前早已讚歎許多殊勝之事然未能得入乃
白彌勒菩薩言唯願大聖開樓閣門令我得入時彌
勒菩薩前詣樓閣彈指出聲其門即開命善財入善
財心喜入已還閉閉時如何便是觀音入流亡所底
消息然後善財於樓閣中見百億四天下百億梵率

陀天一皆有彌勒菩薩降神誕生游行七步觀察
十方現爲童子居處宮殿爲一切智出家苦行降伏
諸魔成等正覺梵王勸請轉正法輪升天宮殿而演
說法劫數壽量衆會莊嚴所淨國土所修行願住持
教法皆悉不同善財非但見彌勒菩薩一周佛事又
自見其身在此一切諸如來所亦見於彼一切衆會
一切佛事以海印三昧一印印定更無秋毫以爲透
漏既見如是無量殊勝一切莊嚴自在境界已彌勒
菩薩即攝神力入樓閣中又彈指作聲告善財言善
男子起法性如是此是菩薩知諸法智因緣聚集所
現之相如是自性如幻如夢如影如像悉不成就爾

時善財聞彈指聲從三昧起於此時節忽然打失布袋然後彌勒示以如上境界無有去處亦無住處非寂非常遠離一切師召大眾云既是來無所從去無所至則雲門大師手中扇子教跳上三十三天築著帝釋鼻孔東海鯉魚打一棒雨似盆傾又有甚麼過當知遮箇時節具無量廣大智慧門無量神通門無量言詞門無量不可說又不可說一切佛菩薩自在受用門諸人若能如是信如是入方知先聖道過去一切劫安置未來今未來現在劫回置過去世乃喝一喝云若不喝住打葛藤直到明朝擊禪牀下座
孟郡王請普說僧問達磨九年面壁懸鼓待槌和尚

早晚掛牌未審穿得幾人鼻孔師云只穿得你一箇僧云其由無鼻孔作麼生穿師云好箇師僧却無鼻孔僧云爭奈即今何師云也是稱鎚蘸醋僧云和尚當時爲什麼打失師云看樓打樓僧云怎麼則被學人穿却師云是僧云只這一是也不消得師云始終作家僧云未是好心便禮拜僧問鑪鞴之所點鐵成金時如何師云鑪鞴進云未審向什麼處下槌師云照顧鼻孔進云盡大地是箇鼻孔和尚如何下手師云拖出死死著進云真不掩偽曲不藏直師云且得你領話乃云盡大地是箇鼻孔直是無你下手處直饒下得手不干你鼻孔事若識得鼻孔三世諸佛

諸代祖師古往今來一切知識鼻孔總在這裏一時
識得直饒識得未是本分衲僧若是本分衲僧眼見
佗不着耳聞佗不着心思佗不着口議佗不着饒你
恁麼始入得育王門未見得育王人喚什麼作育王
人良久云各各照顧鼻孔謝詞復云圓悟老和尚在
京師某與郡王同時問道佗未有箇入頭肚裏多知
多解常記得在火爐頭說禪佗纔落草便將火筋撼
佗手蓋佗是箇中人所以與本分相見自京師相別
及至來住徑山時因過其門纔見便云公別後禪隨
官長此面相見死與舊日不同了也佗不覺笑及其
吐露消息果合妙喜相法真有所得處及款話夷門

相聚時事元來與佗說底話都記得一句也不忘蓋
關挨子一轉從前聞人說底都得力其夫人乃王開
府待制女極聰明曉事因樞密公參禪軟言尉諭之
遂回心皈向佛乘豈非前報世中元是般若眷屬某
在衡梅首尾十七年得佗家齋僧錢菴中養五六十
衲子及山野授育王渠知平江又送五百千來齋僧
阿含經中有三卷盡說齋僧功德宣律師問韋陀天
何等功德最大荅曰齋僧功德最大佗做許多官職
請俸祿不別使只是齋僧詞多不錄大衆適來許多忉怛
是世法耶是佛法耶嘗記得老果和尚每陞座謂衆
曰老僧熙寧八年文帳在鳳翔府供印當年崩了華

山你後生家幾時知得遮幾句兒無時不說然後隨其所請回向下座或問曰和尚因什麼寶花座上一向說世諦耶果應之曰癡人法豈有二種我圓悟老人最愛作遮般說話祖師云法無二法妄自愛著衆心用心豈非大錯趙州云老僧拈一枝草作丈六金身有時將丈六金身作一枝草用以至臨濟三玄三要汾陽十智同真無非是遮箇時節如隔窻看馬騎眨眼便蹉過佗分明向你道要識是非面目見在你若透得遮金剛圈吞得遮栗棘蓬不妨是箇明眼衲僧一任拈東作西指鹿爲馬喚作世法也得喚作佛法也得道有也得道無也得取不得捨不得不可得

中只麼得且道是箇什麼物得恁麼奇特良久云面目見在喝一喝下座

大慧普覺禪師普說

士

秦魏國太夫人田氏悟真助緣

仁壽經頌石和者遺命以此無所付命
身性悟心禪師中岩和者自通命是



2
7
L

